

淮海英靈集

淮海英靈集

鄉人阮元輯錄

宗元豫

字子發其先興化人祖名世住江都宜陵鎮之東原遂為江都人元豫與觀元鼎皆名世之孫元豫

父萬化官潮州府判卒於潮元豫竭力扶輿歸貧不能葬乃蔬食不除服十餘年及葬乃止隱居著書不事聲譽深於古文出入歐曾之間所著有史論識小錄詩文集共若干卷

吳子樸北遊

畱君不可住惜別強登樓塞上征鴻動淮南落木秋黃河看曉渡明月照孤舟想到金臺畔應添弔古愁

早春送李季子南遊

千里征帆繫柳陰一尊高閣共披襟雲山正好來新句春月初明別故林去路清風聽畫角懷人永夜奏青琴江南到日梅花放珍重歸鴻寄好音

宗

觀字民表號鶴問江都人以江寧籍中康熙壬午副榜官貴池教諭遷常熟工詩與從弟元鼎同為王

阮亭所稱賞郡志言鶴問詩蕭疎幽雋
在王孟韋柳之間惜未見其全集也

龍華寺

雀舫出畫溪筍輿入山腹數里越翠濤煙雲時換目到寺未
知門洞口丹崖複一逕轉深篁長松滃萬綠樹樹吐梅花芬
霏散寒玉平疇一坦步流泉聲斷續雲日冠澄鮮葱蒨淨如
沐香積引山溜竹筒激噴瀑方軌筍蕨肥夕陽苦相促攜取
白雲歸揮手謝高躅

大梁

馬上黃河夕照明綠楊如畫擁新城月荒梁苑停車路酒醒
關門擊柝聲遠控豫燕開幕府安流汴蔡漑東京銀筭金甲
都銷歇彈指桑田又可耕

越城

越山綿亘壁雲根嵐翠溪煙自一村蘆荻秋寒詞客夢苧蘿
春弔美人魂羣峰突兀開秦望霽日蒼茫辨海門我欲往探
青玉字鷓鴣聲裏夕陽溫

康山

檜老三間屋鄒枚昔竝登舊遊催急景新築最高層霞氣截
山雨秋蟲亂樹燈六朝煙水外危檻幾回凭

宗元鼎

字定九號梅岑別號小香居士江都人居東鄉宜陵鎮之東原爲阮亭門人故詩以才調爲主吳蘭

次題其居爲夫容別業七言詩如來逢鶯語詩從作去
被人畱酒重醺雙柑香澗佳人手半臂寒添酒客肩極
爲阮亭所賞載入漁洋詩話阮亭每謂其詩風華
婉媚自成一家所著有夫容齋詩集新柳堂詩集

擬劉孝威遇織人寄婦詩

驅車出郭遊遙望東南樓中有傾城艷織緯含怨羞朝織紅
芙蓉晚織雙飛龍霞光孔雀舞芝草卿雲封停梭有所思羅

袂輕風吹纖手理裙帶孤坐顰蛾眉執杼細徘徊芳齡幕上
才斷取機中素寄與良人開良人年幾何婷婷三五多贈我
明月珠貽我雙綺羅故情不忍忘故人空守牀豈以茱萸烈
棄捐蘭蕙芳莫作白頭吟常理綠綺琴身是他鄉身心是他
鄉心區區抱眞亮艷冶不復情歸來南陌上不戲秋胡金

雨後

暑退易爲雨孤村爽氣高野蠶枯細繭庭樹落殘桃碧潤秋
三徑涼添水半篙江鷗應笑我歲歲偃林臯

懷周櫟園先生

舊日何郎閣猶開玉樹枝情深初不覺別後始長思離緒輕
千里春風又一時美人明月下都唱竹枝詞

夏日同金耳中黃仙裳諸駿男泛舟限山字

五月城溪足往還乘船同放小橋灣一雙楚鳥下空水萬疊
夏雲沈遠山白雪調高才子曲紅蓮香勝美人鬟他年別夢
蒹葭外回首風流未易攀

冬日過甘泉驛

記得當年來古邑馬鞭帶雪繫樓前雙柑香灺佳人手半臂
寒添酒客肩忽見荒堤摧暮草空傷衰樹沒寒煙風塵滿目
深惆悵却望誰家寄醉眠

過山中

東風吹雨度香芸遠近煙嵐曉未分一徑濃桑沈碧影半溪
流水盪輕紋來逢鶯語詩從作去被人畱酒半醺自笑年來
塵事縛羨他老圃說耕耘

遣悶

簾捲東風寒食天綠陰紅雨隔輕煙春來情緒宜多病眼底
流光亦可憐總是茶香耽永日一從詩好度經年誰知憑仗
銷愁處翻引愁心逐逝川

寄阮亭先生

淮南風景幾人知好是清明細雨時酒冷香殘腰帶減詩狂
他日想王維
休從白傅歌楊柳莫向劉郎演竹枝五日東風十日雨江樓
齊唱冶春詞

雨中畱鄒麗農

新開蘭蕙正芳菲初到鱗魚入饌肥正是三春好時節如何
拋卻渡江歸

古意

沈沈煙柳汴河邊行到郵亭兩岸蟬當日征人含淚語分明
爲約只三年

對絳桃有感

曾記江頭醉買春七年珍重絳桃身誰知今日花閒酒不見
當年種樹人

楊

潛

字滙南江都人康熙乙酉入纂修館康熙辛卯舉順天鄉試壬辰

南巡以獻賦收賜

進士改庶吉士授翰林院檢討博聞強記工詩文卒于官

曹棟亭銀臺招遊近郊

草脚青回柳線長春風一路綠雲香新詩題徧青山曲收拾
閒情付錦囊

郭外雲山面面佳綠楊低護酒人家風前別有雄心在閒攬
雕弓射落花

孫閱達

字天士通州人康熙甲辰進士通理學任山西太原縣知縣有惠政沒崇祀鄉賢祠著遜菴詩稿

冬日答陸稼書見懷次韻

一代儒宗推輦下空來北地覓津梁時當力學官爲隱性不
趨炎暑自涼樂在孔顏今日事道傳伊洛古人光頻年未得
同心語轉眼春風看綠楊

寄魏環溪尚書

聖主千秋遇幾人能報之大臣行直道君子頌良時白簡天
應鑒青編世不疑好持冰玉節耿耿寸心知

黎

曜

號礪菴典化人
康熙甲辰進士

揚子江

一水橫天塹洪濤萬里來地分三楚出山自五州開風雨龍
鼉起雲霞日月迴魏文曾望幸南北思遐哉

黎

田

號從甫興
化歲貢生

雨後步藥翁精舍

白水環蕭寺紅霞散晚天舉頭剛得月入樹喜聞蟬僧偈雨
花地客心鐘磬邊蒲團閒打坐何似老青氊

殷

嶧

字桐高號畫村高郵人康熙庚戌進士鼎季子也
生長高郵寄籍天長丙寅拔貢中丁酉副榜任太

原令案無畱牘免官歸課孫尚鉉尚鑣等皆成名諸生卒年八十三素工詩所著有樊桐詩鈔

月夜懷石梁故人

竟夜清如許孤吟亦自豪生平幾兩屐歲月一綈袍落葉如
人靜隣鐘出寺高所思張仲蔚何處掩蓬蒿

天津曉發

露氣白千里馬頭方向西沙平還沒轍村近不聞雞朝日背
人出荒煙垂樹低提筐爭入市新熟紫消梨

齊河縣

連日山行惡透迤卽路平過橋當野市沽酒出荒城葛藟編
籬種踈躡得而生愚民無飾說稱道長官清

登榆林城樓

一線界華戎軍牙鉅鎮雄河環大磧北城抵受降東雪印封
駝跡風鳴射虎弓何時遺憾在韓范使無功

隱峰菴

坡陀西去折回南不過深林不見菴一半屋依山作壁兩三
僧與佛同龕種來茶子今年大嘗偏新泉此地甘猶歎未除
文字障棲心何日向伽藍

眞州道中

桃花夾路亞肩輿地入平寬竹木疎柳樹颭風初繫馬草堂

經雨自生魚清明幾日種開甲煙水一區人荷鋤蠶事漸興
農事急故山回首正沮洳

李蒼存以過京口不得晤有詩見懷次韻却寄

六朝山色映斜曛聞道扁舟渡水雲蠟屐爲尋焦處士投詩
應弔郭參軍蘆中窮士惟彈劍江上生涯只賣文多少舊遊
書問絕贈言珍重孰如君

晉陽宮

粉香填滿玉鉤斜還取離宮貯麗華巫峽信高偏有夢江都
雖好已無家平川牧笛吹楊柳白日游絲習李花等是興亡
歸蔓草夕陽搔首一長嗟

田

登

字梅岑江都人康熙間滇黔逆變從祖將軍南征
駐湖湘者數年其詩多沈雄矯鸞之音與黃岡杜

于皇齋名揚州太守傳有菴愛重其才嘗分俸養之且
謀爲置田所著有煙照集二卷五律尤精如重晤沈天

土云月明沙路淨雨歇稻花香雨夜云鬢冷窗侵雨圍
荒鐘引蟲斗門鎖云破扉猶入燕老樹自開花秋杪過
雪公靜室云院靜松聲細山寒鳥語稀九日尋準提菴
云修林辨夕磬細路到江花望湖亭云荒林孤鳥下寒
渚數家連香草亭云鳥影溪光定苔痕屐齒荒姚復陶
招飲旗亭云野路行秋涼孤城上夕曛春日懷人云峯
翠猶含雨江聲欲上潮句皆可摘錄

入大峰山

一徑入蒼翠羣峰下馬登草廛眠虎地壁老挂猿藤巖壑時
聞磬塵懷不到僧風塵吾老矣欲住更何能

江州詞

菱葉青青葦葉黃人家東去接橫塘採菱渡口風波急駕慣
輕舠是女郎

稻穫農閒犢子肥西風水落釣魚磯夜深燈火柴門亂了髻
兒童照蠨歸

山閣獨坐望南郭諸山懷陳三壇

曉日登高閣遐睎郡南山南山秋自佳悠然不可攀中有素
心人抱書清晝閒朝見飛鳥出暮見飛鳥還

乙卯冬日石城喜晤儼若

一片石城月清光此夜同地荒多野燒笳急少歸鴻人覺別
來老詩看窮後工十年茅屋意今日話難終

夜行

舟師暗相喚行子各登航有虎知山險無雞覺夜荒月斜孤
島磬笠重滿天霜此際鄉思切煙中辨渺茫

途中晤故鄉周子

舊路旗亭那可過神州翻不似滹沱地經戰後人逢少江入
秋聲夜聽多白首對君心更熱青燈照我飲還歌三年消息

空惆悵獨立南樓望曉河

寄懷蔣前民

我友蕪城客騎驢忽入林閉門常不飽種竹已成陰萬事餘
高枕衰年只苦吟春風朝夕望愁絕海雲深

長安秋日送祝亮臣歸青山草堂

碧天隱隱雁南飛樽酒河橋對夕暉醉裏不知家更遠秋來
又送客先歸黃金臺畔葉初落白紵山前橘正肥自愧餘生
仍浪跡何年一棹叩君扉

初歸有感

廿年烽火動江關湖海歸來始覺閒檻外青山依舊在階前
海鶴幾時還凋零親串低回問狼藉詩篇次第刪獨愛仲容
能解事一樽朝夕破愁顏

寄懷儼若江右

雨洗征塵靜花飛野戍空人間無客路天上有歸鴻芳草愁
眉外春江野望中相思似潮汐日到小孤東

過訪傅育菴明府

政成無一事清淨對琴尊水鳥上庭樹溪流抱郭門俸多分
客慣詩獨許吾論醉裏仍攜手磨崖碑共捫

瘦槐軒聽小史度曲

譜得新詞宛轉歌瘦槐軒裏酒如何却憐頭白他鄉客每到
歡場涕淚多

懷柔道中

路入幽州北春深水尚堅寒風人面黑沙跡馬蹄圓獨樹三
家堡殘笳萬里煙古來征戰地今日罷戈鋌

夜坐天濤秋嘉館同賦兼柬黃仙裳

天淨雨初歇開軒秋滿園一蛩吟到曉兩客淡無言月落歸
魚艇煙消見水村獨憐黃處士寂寞鎖松門

春日過育菴大令

花縣閒如昨一官貧至今無糧分到鶴可賣止餘琴簾捲溪
禽入杯銜山翠深汪倫特瀟灑高閣好聯吟

歲暮薊門送友人之任臨洮

薊門西去路我昔到臨洮四顧沙如雪一天風似刀關城連
戰角官舍入蓬蒿送爾晨風發臨岐空鬱陶

薊門送吳秋屏南還

落日渾河上寒鴻著地飛可堪懷古處常此送人歸竹葉山
村熟梅花江路肥杜陵遺老在也些山一爲歎荆扉

黃

雲

字仙裳號舊樵泰州人居姜堰鎮善談論慷慨負氣遇俗人稍不如意輒譏罵人目爲狂初受知于

太守陳素素被枉破家仙裳不避險難與之同遊晚年益貧苦屢辭聘召益肆力於詩所著有桐引樓悠然堂

稿二

陽兒之江上中途遇雪

木葉蕭蕭打華門一天風雪又黃昏辭家初放今宵棹沽酒
却投何處村自愧饑寒驅愛子誰能羈旅重王孫勞生須信
難高臥未敢懷安守故陵

金陵下第歸夜泊朱家嘴舟中呈唐祖命

江南江北煙波接百里乘風願亦違宿浦爨分漁艇火泊船
月近酒家扉露寒漸覺征衫薄秋盡仍從舊路歸幸有故交
相慰藉中宵痛飲任忘機

青溪月夜續燈菴卽事

莫信繁華擅六朝
茆菴深坐話清宵
金陵萬事都如夢
月色猶留舊板橋

送何龍若歸京口

米家畫裏放船迴
一路看山倦眼開
只恐還鄉無舊業
桃花空傍戰場開

殷譽慶

字彥來號蘧門江都諸生詩情清麗極爲王文簡所稱嘗集一聯呈文簡云天下文章莫大於是一

時賢士皆從其遊當世傳之性狂簡落魄而死沈歸愚宗伯覓其稿不得止得近體二首稱爲完善有聲光云

玉山亭

萬頃澄光倚翠屏
磯頭縹緲峙孤亭
窗收吳楚千帆白
座揖金焦兩點青
高岸浪飛遙似沒
危崖水落倒堪聽
扁舟待渡依江滸
疑有魚龍積氣腥

暨陽懷古

此地句吳戰壘開尚餘重鎮楚江隈城邊斥堠連天遠海上
魚龍捲浪來黃歇冢荒迷蔓草延陵碑古蝕蒼苔西風入夜
鳴哀角并和砧聲徹曉催

與查夏重集劉鹿沙寓齋分得談字

左司吟嘯處齋閣對晴嵐高致傳兼隱幽人許共探論詩懷
舊雨隸事倚微酣好續竹垞句他年作美談

贈劉鹿沙

劉子豪宕殊不羈才名藉藉聞京師一日騎馬偶詣我排闥
橫被闢人辭投以蘊堂詩一帙近體工麗古瑰奇眼前詞人
詡述作如君直可奴隸之復伸繭紙寫長句謂我略亦知爲
詩篇中往往過稱許痂嗜或恐旁人嗤長鬚傳至讀未竟急
走相覓披詩帷兼隱先生適召客入座輒命畱銜卮新知一

見如舊識吾輩投合獨文儀往時長安盛吟社羣賢縞紵恆
相貽十年消長不可料此事亦逐流星馳靈光猶幸有人在
騷雅壇坫勞總持如我曹檜洵小國亦願結束隨旌麾

題黃硯旅出塞圖

邊城一抹曉瞰紅魚海龍堆指顧中莫向離亭折楊柳玉關
長笛怨春風

張漢瞻歸嘉定

十年重作燕城客吟過春城阜茨橋興盡剡溪逢改歲打船
風雪晚蕭蕭

張

璞

字中玉號琢堂儀徵人康熙癸巳恩科武舉人
少時馳騁裘馬而詩筆高潔與團鶴為詩交著

有琢堂詩
鈔一卷

春中過蘿園二首

槐花開欲殘草色萋已綠荏苒遶春中兩足日瑟縮園林得
散步憑軒恣遐矚一桁江南山濃翠出新沐
此地吾舊遊飛觴記平素繚曲認空廊依稀存竹樹光陰隙
閒駒年華已非故棖觸發長吟斜陽戀歸路

秋夜同友人讀亡友方咏亭詩稿有感

月白霜清鴈影寒把杯相對說方干十年客向淮南老一卷
詩畱視北看豈是才人生有數近知天道問原難高吟尚記
從前事細翦燈花到夜闌

京口泊舟因登銀山絕頂

潮落江關路同人小泊舟攀林登絕頂極目俯長流衰草南
徐岸殘陽北固樓一帆春水滿載酒擬重遊

和李琴齋明府暮春遊蔣園二首

爲愛林亭郭外閒，烏衣小隊叩柴關。
春心容與澹臨水，望眼迢迢青對山。
麥秀宛迎官道合，雉飛恰趁後車還。
應知此際追陪客，已醉光風霽月間。

攜尊重上木蘭船，盡啟篷窗眺遠天。
勝地自宜山簡醉，雅懷眞比竹林賢。
三年花縣人如玉，百里江城吏似仙。
好句傳來期屬和，空齋踏徧幾曾眠。

王西浦招集也，園余以事阻，邗上歸而補作。

風雨滿蕪城，客舍如年度勝遊。
集朋侶遙念招攜處，苔磧上春潮。
蘿軒匝芳樹，揮翰落雲煙。
飛觴道平素，日月不我畱。
青春行欲暮，歸掩東原扉。
悵望城南路。

立秋後一日過峨嵋院

偶入招提境，因登小閣頭。
江天餘落日，雲木澹新秋。
白鳥一

羣下清泉三面流眼前足圖畫何必羨滄洲

送鶴筴之礪山廣文任卽次畱別韻

宦遊難遽別顧我北山阿秋樹正搖落故人能幾多一鐙侵
夜坐孤月送雲過重念舟車路行行傍大河

初冬同人掃楊黃亭墓

故人埋骨北山巔來與招魂訪墓田老淚西風沾野草孤筴
細路入寒煙新愁迢遞荒原外往事蒼茫落照邊絮酒一卮
同醉處未吟遺句已淒然

壬申夏五同鶴筴芷岸藍田書屋坐雨

竹逕迷濛暮色橫羊求重與續前盟林深五月有秋意節近
三時多雨聲吟社未移江上權閑牕且話別來情何年共結
東菑屋蓑笠相從事耦耕

張

釋字異言號墅桐欽之柔嶺下人占籍江都善交友

後多
零落

貧士

貧士柴門裏高吟乞食詩苦緣廿世棄清尚畏人知椎髻梁
鴻婦蓬頭孺仲兒北風正淒緊誰為半氈遺

房縣哀

哀前縣令贈太僕卿郝公景春也崇禎十一年

保康間而房適常其衝居民日惴惴公時為縣令捐
循備至明年張獻忠反穀城約汝才同反賊騎大至
監軍僉事張大經已降賊竝檄公降公大罵碎其檄
與子鳴驚謀戰守時城中僅贏卒二百乞援於文燦
凡十四往不報鳴驚木諸生擐甲登陴擊傷賊忠左
足將用間襲擒之閱五日指揮某啟北門揖賊入公
與守備楊道選巷戰不屈死鳴驚與僕陳宜主簿朱
邦聞俱不屈死事聞贈恤有加建祠祀之公故揚之
江都人舊有祠在城西法海寺側丙戌秋予
偶過是地遂肅謁祠下歸作是詩且徵和焉

黑雲壓城城不開房縣四郭蟻賊來九營之衆燄方熾生降

妄受眞庸才鴟梟野性誠難格變起一朝還搆逆披堅執銳
賴何人羸卒倉皇惟二百使君一身繫安危登陴含淚親揮
旗連天銅馬盡充斥極地飢氓無子遺公子書生稱智勇橫
刀臨敵龍媒聳岳家自有銀官人辟易萬夫皆震悚誰與揖
賊自開門驕帥紛紛各竄奔慟惜名城齊陷賊彈丸如此更
休論忽傳檄至爭開視乃是勸降書一紙含垢監軍但願生
裂背縣令惟知死一門義烈震鄖襄郝氏勳名載太常楚些
招魂到鄉國叢祠異代永烝嘗秋日閒行柳湖側牆角苔碑
土花蝕不堪細讀舊銘詩瞻望靈旗長太息當時撫賊誇奇
勳廟堂建議徒紛紜轉念坑降計亦得只嗟世少武安君不
見思陵憑玉几肝食平臺亂難弭豈獨櫻鋒房縣哀喪亡禍
本從茲始

張符驤

字良御泰州人康熙辛丑進士翰林院庶吉士

清明後十日會葬故友閔賓連于平山堂下

楊柳花中盪樂行孤墳芳草近清明知君芒屨行吟慣試看

山光與案平

吳

遵

字賓洛江都人

遊西谿

絕境鮮樵牧始知山已深輕舟泝流水斜日在幽林有鳥鳴

深樹無人知素心不煩絲竹韻萬籟有餘音

汪

楫

字舟次號悔齋祖籍休寧居於江都官贛榆縣教諭康熙己未召試博學宏詞取一等第十

五名授翰林院檢討纂修明史癸亥奉命冊封琉球充正使過神廟三日而至宣示禮成且為其國撰

孔子廟碑文章華國焜耀海疆有餽饁却不受國人建

卻金亭志之四十年後復有使琉球者其國禮儀猶遵

悔齋所改訂有詩僧宗實年七十餘尚誦悔齋詩不輟

其所以孚遠者可知矣既歸尋以才略出授河南府知

府在任置學田於嵩陽書院聘耿詹事介主其事擢
建按察使晉布政使治績尤著內陞京卿沒於途次從
祀鄉賢祠悔齋性簡介不妄交意所不可雖尊貴未嘗
以言徇南昌王于一客死錢唐悔齋素未與締交爲之
歛賻又搜集傳其遺文其重道誼類如此新城王文簡
公稱其詩以古爲宗以潔爲體以清冷峭蒨爲致尤爲
周櫟園亮工稱服三十後歷遊西山白岳詩境幽深孫
豹人枝蔚謂其變利爲鈍不可測議入詞館後典重高
華易幽峭爲空闊則汪堯舉琬所稱蓄富養深無施不
可者也著中山沿革志一卷使琉球雜錄四卷悔齋集
一卷山間詩一卷山間詩續集一卷消
寒集一卷觀海集一卷京華集一卷

送吳五賓賢二首

霜林棲鳥啼蕪城天不曉行子急道路仰視參與昴年年歸
此時芒屨踏枯草寒氷結髭鬚朔氣令人老歸家常苦遲出
門常苦早子廉有賢妻餽糜共亦好

郊原積冰雪日出光泠泠萬物苦閉塞只待春風生君今已
皓首毋庸歎飄零在天亦有雲在水亦有萍丈夫惡飢寒何

以垂令名飲水被鶉衣高節誠可貞

歲暮南村寄懷周櫟園先生

端居鬱不樂徙倚開雙扉曠野何蕭條寒風吹我衣
臯蘭無遺秀原樹號枯枝翔雁鳴離離離獸西北馳
塞裳望所思層冰塞河湄歲暮多苦懷宿昔願屢違
明珠辭水底沙石無光輝古琴塵匣中悠悠感鍾期

題五子罇酒論文圖

渭北王幼華來江東與吳埜人孫豹人亦有吉汪舟次交命曰五友

繪圖以歸分賦

汪子無才負傲骨尋常出門少親暱僻壤相逢吳埜人
風塵意氣膠投漆埜人之友亦落落論詩共許孫與郝
幾處歌聲向一燈吳陵新安與焦獲焦獲自昔多名家
孫郎動向人前誇眼中難見李叔則戶外忽來王幼華
王生結交殊不苟屈

指素心惟五友預愁他日走長安不似於今時聚首西湖戴
蒼能寫真遊子不顧囊中貧却將渭北江東意圖成罇酒共
論文更有黃山江天際畫水畫石多生氣援筆添寫兩株松
百尺寒岡接蒼翠裝來卷軸喜同看皓首孫郎酒不乾郝子
撚鬚時欲笑吳生抱膝動長歎汪子把卷苦抑鬱王生惜別
何辛酸王生王生勸爾且盡尊前歡明日徒從紙上觀

題天女散花圖

王阮亭先生小像

維摩說法天雨花此事由來稱最幻諸大弟子徒紛紛況於
楫也何由辨朝來問字抱琴堂倏見維摩臨素練異人豈必
多口耳髭鬚當風目含電白鸞尾動虛空驚十丈雲開露金
釧繽紛紅雨隨指墮清淨天人殊繾綣我對此圖長咨嗟人
世簪裾何足衒妙義要使千人服寂莫繩牀亦堪羨前身或

在方丈中不知曾否沾花片或語汪生且勿眎君不見阮亭
詩法動塵寰此圖自寫王公面

題程氏小樓

山盡忽登樓園林一望收池平全藉雨桐老不宜秋入座圖
書亂開罽風露悠敝廬雖接近薄醉卽淹留

尋影園舊址

同郝山
漁賦

園廢影還留清游正暮秋夕陽橫渡口衰草接城頭詞賦四
方客繁華百尺樓當時有賢主誰不羨揚州

晚發白沙

北風初作雪逋客正辭家濁酒當寒水輕帆入暮笳燈明村
犬吠潮落榜人譁歷歷疎星外江煙起白沙

送韓醉白

韓生挾劍走燕都相送東門盡酒徒十載飄零豪氣在春風
春雨唱驪駒

中秋夜施愚山先生招集龍山

邀月層巒上傾樽畫舫中水明全滅燭風過一推蓬直樹無
棲鳥圓沙有釣翁夜闌莫辭醉清興更誰同

暮抵香城山寺有懷周伯衡觀察徐伯調陳伯璣諸子
同愚山阮懷限中字

溪聲一徑入鴻濛逐水尋幽路不窮野菊背開巖石下歸雲
倒捲亂流中峰迴幾處江湖白日落前山草木紅却望會城
何地是疎鐘肅肅起飛鴻

青原道中

得著看山屐山行不厭遲岸崩懸老樹花落挂游絲鳥路望

中是虎風何處吹雨過石壁淨應許獨題詩

揭子宣過訪

奇人曰揭暄健翮恥飛翻斫地劍三尺寫天書萬言

著有寫天新語

好風吹草屨細雨到柴門高論知何極相傾只酒尊

去五老亭可三十步一石巋然萬松間方廣盈丈許外
眎如削聞極上人手種海棠其側時臥遊焉索余題名
因名之曰不化竝系以詩

壁立萬松坪天然削不成坐應從五老夢可識三生花落茶
煙少人來積蘚平遠公幽興極畱客一題名

過山溪石壁

萬山勢欲合一水蒼然分夾岸攢烏石中流湧白雲瘦驢停
折坂獨客畏斜曛莫問驚人句溪聲不可聞

白岳天門歌

誰將脩月斧劈此摩雲石石開雲散崩崖懸欲墮不墮五千
尺絕壑初來日月光猛虎驚迴風雨夕洞傍飛瀑出重檐人
過不使衣裳沾晴空滴盡老蛟淚雨後幻作蒼龍髯學語小
兒作解事碧落遙挂珍珠簾我來山中歲欲暮時向天門踏
雲路直須老此莫教還君不見畱客遮門老楠樹

送周伯衡給諫之荊州

時以保舉
赴軍前

推轂存知己飄蓬急感恩老兵輕白面大帥重黃門九月鴻
難聽何時蝨許捫馳驅與休息帷幄正須論

己未元日曹舍人頌嘉招同豹人大可錫鬯其年冰壑
天章石林共集遲武曾次耕西崖不至限韻二首

輪蹄紛歲首吾亦啟柴扃不愛五侯宅來傾雙玉餅辛盤春

早得豔曲老能聽彼美知何處眞同望尹邢

椒漿期短褐花底脫朝衫頌問何人獻杯先少者銜定須判

聲平一石久矣忘去聲三緘四座休輕別羈愁仗汝焚

秋日奉陪益都師暨諸同人集萬柳堂卽席和原韻二

首

蟬聲已辭樹鴈影正橫天白是林間露青來水上煙尋秋宜

漉酒席地好聽泉百道穿畦圃風湍共灑然

別墅同安石新詩得惠連羣峰擁絲竹四座落雲煙便可凌

員嶠何須乞酒泉歌殘踏明月不醉亦陶然

官定後詣

闕謝

恩次對巖前輩韻

漢宮名籍忝初通海曲龍山

詔許同鑰啟雙魚隨旭日樓開五鳳入薰風星辰依舊排天上桃李誰誇出禁中自是闔門多盛事不教昭諫老江東

三月三十日過蛟門寓舍值賦漫興詩成索和

春殘絕少惜春詩授簡無情滌硯遲風日祇教添白髮粗豪豈合寫烏絲最憐深院飛花候正爾幽窗屬草時得句故應誇獨步劔南堂與少人知

山房昨和牡丹詩擊鉢聯吟幸不遲黃霧一朝封麗日軟塵十丈壓游絲無多白白紅紅地可惜鶯鶯燕燕時幾瓣落花今在否護持深喜道人知

前三日同過天壇看牡丹各有詩詰朝風霾大作花盡敗矣

謝家兄弟總能詩夢繞池塘聚首遲幾畝秫田供麴米一盤鹽豉煮薄絲鴈遶燕去無多日人送春歸又一時處處鳥啼

聽不得幽懷只許春令知

有懷長玉叔定閑先
殿居少文諸兄弟

三年不作憶家詩得遂鳥私去敢遲快意便應吹鐵笛懷歸
何用理桐絲板輿四望宜佳日鳩杖雙扶合此時水綠波平
帆影疾一行先報老親知

賈太傅祠

在城東夾馬營卽公故里也
祠久荒落今修葺略還舊觀

端賴吳公說賈生少年猶幸早成名蕭曹有命稱賢相絳灌
何知只老兵學到離騷難作達人能痛哭豈無情遭逢如此
還淪落遺像空畱夾馬營

白馬寺

石渠虎觀日紛紛雄辯高談已厭聞忽白佛言眞逸調獨逃
秦火定奇文梅檀直結千年霧榆櫟遙封萬里雲歎息無端
勞白馬不成龍象不從軍

平泉

李德裕園向在龍門西德裕嘗自爲記曰甯平泉者非吾子孫也以平泉一樹一石與人者非佳子弟也歐陽

公嘗譏之

別館離宮百不存荒邱誰識相公園木棉作雪欲蓋地火柿帶霜時出村勲業自知銷黨局晏游安肯訓兒孫英雄不是耽泉石無限恩仇未可論

出門

勞勞息無時忽忽歲云暮老父呼我言家宿難久住王程幸未迫聞疆應早赴老母拍我肩兒無憂內顧孃今頗強飯耶又齒牙固及此勉王事爲喜勿爲懼諸弟漸成立幼弟行當娶祇此伎作計其他勿復慮聞命敬再拜氣塞語難吐俯仰眞跼踖出處總乖忤忍淚作大言乘風兒所慕

天王大神聖天使百靈護夏至七日風大海直飛渡曰歸寧

久淹屈指在寒露春正開八袞歸來慶初度相風憑木鷲計
程報尺素下堂不盡觴趑趑猛虎步

黯淡灘

灘急不聞呼千車轉輓轡神工較分寸鬼伯待須臾曲折憑
孤權安危仗一夫會看浮萬斛大海射天吳

出五虎門同石來次前使蕭給事韻

長年振柁倚高樓萬里潮迎萬斛舟浪打白頭都是雪衣添
六月忽如秋蒼茫不覺千山遠混沌真看一氣浮最愛乘風
同快馬漫將喘月笑吳牛

過東沙山是閩山盡處同石來次蕭給事韻

揚帆從此別嵯峨鉦鼓爭鳴大旆飄颻浪最知三老健跳波
真有百靈朝矸訇地軸聲初轉蕩激天河影共搖去國迴看

忽千里無邊藍水接青霄

海水歌

好風歛吸來西南
鞭船疾過驅歸驂
茫茫大海百無有
上天下水中舟三
我舟使風得風力
羅經時與長年參
支干在掌辨方位
一鍼東指凝如鑽
須臾兩帆盡相失
碧空遠影同優曇
蜃樓蛟室定何處
岱輿員嶠憑誰探
決皆窮髮祇一碧
摩空浴景相涵涵
吁嗟太古積此水
誰其漸染如斯藍
或云青天落重溟
有如白月澄秋潭
豈知此水渺難極
紛紜萬象中能含
源深體靜露光澤
玻瓈映澈還幽闇
彼蒼蒼者海氣耳
上浮何異山之嵐
木華張融少所見
憑虛作賦寧無慙
提鉛握槩肯相就
太虛空洞吾能談

神騷

驚濤萬里勢搏空三日神飈笑卷蓬此際高堂念游子猶從
五雨祝南風

落帆二首

颺舟信所如那霸忽而至僕夫蹶然興振衣疑夢寐徐聞三
老說咄咄真怪事水程傳自古七日風最利如何甫三宿鷁
首接平地按圖記所歷十未經三四凌空語豈妄飛渡亦何
易捩柁赴曲港屹轉心悸風潮兩相赴迴環任吾意落帆
成一笑茲行了不異

積水渺無極塊然橫一邱洪濤日舂撞土壤能長留草木互
蒼翠日月相沈浮摩肩來婦子語笑爭啁啾海日射便面搖
光如蝸蟻未辨風俗殊亦覺生聚稠安知十洲外此間非一
洲回頭笑愚公神仙何足求蓬萊亦小島未必非外侯執玉

倘來賓

皇帝同懷柔

長風閣喜雨

三年荒微望甘霖一夜輕雷送好音有脚春來

天子惠隨車雨足使臣心蕉花穿戶紅全濕橘葉遮垣綠更深見說塗人歌且舞老夫高眺亦長吟

冊封禮成卽事

夜雨廉纖快曉晴相看搓手賀昇平海風不動秋風勁吹作
嵩呼

萬歲聲

龍跳天門下碧虛光芒萬丈掩璠璣海邦一任誇多寶豈有

珍奇重

御書

紫巾黃帕繞丹墀
鼉響鯨鳴羽扇欹
獨上龍亭呼

萬福錦衣紗帽好威儀

石城百尺擁王宮
渾樸規模自不同
巖壑迴環松影外
樓臺隱現海光中

馬耕田歌

中山山多稻田寡
耕不見牛時見馬
曳犁負輓當町畦
編草絡頭泥沒髀
噴沫徒憐氣凋喪
跼踖安知材盡下
王良伯樂無時無
不待悲鳴淚先灑
側聞洪武開國時
曾來此地求馴馴
驪連橈累舶動千
匹購買不惜傾高
貲陟險衝波有底
急每繙舊史常懷
疑維時布衣起江
左渙號止及東南
陞壯士健兒恣騰
蹕步卒敢向中原
窺閭人太僕但充
位登牀厭穀皆

虛詞誰歟忽建鑿空計外廡祇藉長風吹飄飄遠致列雲錦
騎出奚啻熊與羆永辭絕域騁皇路寸長一技皆得施不走
沙場繫吠畝吁嗟爾馬生何遲今制三年兩入貢使者執鞭
大夫控

天子垂裳顧曰嘻此物何煩跨海送異域從敎寶驪蹕天家
絕不求麟鳳終老邱園何足惜竟辱泥塗亦堪痛吁嗟爾馬
無自傷不逢湯武逢虞唐縱有龍媒四十萬中山只作華山
陽

長史鄭洪良以王命請余畫像畱國中口占荅之

豈是中朝第一流偶持龍節拂麟洲大名那得齊諸葛遺像
何勞比益州稍喜文章堪報國誰憑骨相取封侯靈臺一片
真難狀多謝傳神顧虎頭

姜任修

原名耕字自芸晚號退耕如臯白蒲鎮人學士素

學天文地理禮樂刑名及詩古文詞無不精貫旁通六

書畫奕算皆詣絕品胃巢民曰姜子早飲香名當突過

陳髯陳髯者其年檢討也儀封張清恪公撫吳中見先

生文奇之招致幕府與講洛閩之學甚契一時學子翕

然從之康熙庚子舉京兆試易名在修辛丑捷南宮第

三授翰林院庶吉士癸卯散館一等時重守令親民之

官凡五月卒以特簡知清苑縣事聽斷如神案無留牘任事

不廢年七十六卒著有讀易軒書五卷讀詩小箋六卷

漢魏六朝詩釋四十卷唐五七律釋八卷楚詞釋十卷

白蒲子古文十二卷時文若干首白蒲子編年詩三十

春遠

野燒凝寒未轉痕陽春何日到衡門從教射虎難封廣底事
聞雞便舞琨萬古羽毛空碧落半龕燈火送黃昏成蹊桃李
爭時艷凍蘂消香是故園

崇川北山下拜駱臨海墓

古墓犁田出石稜題名不是比丘僧
斷雲坐鶴黃泥口誰向秋風葬駱丞

園居

相隨鷗鷺伴樵漁計向西河結小廬
非爲倚窗堪寄傲本來閉戶得安居
巖豪班掾輕投筆窮老虞卿苦著書
惟有灌園陳仲子一生樛散把犁鋤

看劍

賸有狂奴態誰爲斫地歌
眼看三尺水心受十年磨却讓鉛刀
利仍然結友多底須不平事暗匣夜鳴雷

姜恭壽

字靜宰號香巖如阜人任修子乾隆辛酉舉人工篆書善畫事詩宗魏晉常往來閩楚間雷翠庭中

丞銖督學浙江時佐幕府有詩云燈花吐餞虛前席莫謂無神鑒此衷晚年病耳聾悒悒以死臨終命以古玉

二枚華嚴經一部殉殮所著文集二十卷
原詩集十六卷五叩錄時文一百二十篇

咏秋花

欲雨不成雨秋風原上來稻花綴其英柴門晝不開烏犍臥
牛宮陂塘亂鳴蛙豈無蘭與桂而非余所諧昌昌天地心邈
邈黃農儕浩浩

君國恩悠悠沮溺懷

稻花

暮色落秋旻蒼然生老圃庚庚甕眼籬紛紛豆花雨豆花旣
以白豆莢亦成縷晚飯臨涼風秋實腴堪煮上有青蟲縣下
有寒蟬語霜田落爲萁小人良辛苦

豆花

季女抱素姿獨向空階立冷墮白玉簪蒼煙不可拾回首背
西風秋苔濕珠輒彼姝漢水濱解珮殊戲狎玉體未分明語
之頰兩頰涼院下魚鑰風簾蕩犀押金蟲栖香鬟水蟬搖寶

蜀粉身玷不磨皎月照幽闥

玉簪花

芙蓉江上秋芳華寥木末昨夜風雨橫佳人與我別丹萼委
晨霜可憐紅瑟瑟欲采寄微波秋光不堪折驚起雙鴛鴦波
冷花搖光花光搖不定心與江波長

芙蓉

秋水不染芳杜搖孤翠白雁下橫塘照見相思字天末懷
夫君日暮期不至江南可采蘅西風吹垂淚別去可復論露

華易蕉萃

杜若

古巷實秋槐積滿門前路衡茅閉蓬蒿苦花變涼序青蟲棄
不蝕黃雀食還吐寂寞巢居子老屋但因樹日暮陰漸疎高
臥尚如故榮落定何如元駒別枝去

槐花

寒露濕茸茸腰褱灰古蘚荷花紅欲死秋羅不堪翦翦羅持
作衣化爲雲與泥翦羅持作裳莫繡鴛與鴦鴦盡飛起秋

風怨羅綺白髮翦易生淚眼看花幾

翦秋羅

題梅花

一枝瑤藥倚春風鶴去寒山夢已空記得夜深林下過月玲

瓏又雪玲瓏

姜文載

字在經一字命車別號西里如皋人任修子弱冠補博士弟子員與兄香巖有二陸之稱能畫年三十而歿有西

里存稿三卷

春興

花信分番又幾回香飄紅杏晚風催荒墳有骨埋青草石馬
無聲臥綠苔曉夢依稀迷化蝶春情靡曼逐飛灰相思竚立
欄干久雙鯉何時到玉臺

一片光風任渺茫瑤臺十二冷雲漿懸知腸斷魂難斷空負
花香酒更香鶯語上林芳信早鶴歸華表晚陰涼江南夜夜

愁春雨莫看殘紅到海棠

李仙榜

字松蘿儀徵人著雙桐閣詩草

楊柳詞

楊柳青青鎖暮煙春來常漾落花前但愁眉黛今如許一墮秋風便可憐

雪霽

雪晴寒轉劇枯坐恐難勝醉客酒無力觸簾風有稜縕袍且復著篝火時相凭為問老梅樹今朝開未曾

戴勝徵

字岳子休寧人康熙間居泰州之東海及河阜因家焉愛遊白嶽以舟載其石歸因號石桴窮居海濱吟詠自適與吳野人同歌嘯於寒蘆野水間著有石桴詩鈔上下二卷又名河干草堂集石桴五言如西橋

桴詩鈔上下二卷又名河干草堂集石桴五言如西橋黃儀逋故居云水天寫疎樹夕照閃昏鴉涇河云秋柳不藏日暗川始度鴻時人稱之

三賢祠

祠祀監西溪鹽倉范文正仲淹轉運使胡文定令儀發運使張文靖綸

范公倡大義胡公翊贊之張也良足智屹然不易詞海壇一朝捍秬稌始及時上德合欽世居人因廟祠歲時會有幾風雨悲傾歆羈禽語暗牖旅穀生荒墀落日坐懷古遺澤猶堪思

河阜歎

雷霆動天地淮泗決洪濤驟漲滿堂室四顧皆滔滔雞飛屋上叫犬蹲牆頭號家人聲慘裂水勢檐前高魚鼈互跳躍相顧樂其曹蛟居誰見慣隣舍偕我逃三日絕火食千錢賃小舫同難煙波中日瘦風蕭颯

由河阜復遷東洶

棲遲稍已寧宅舍今又移東裝治糗糒去去長此辭阿母撫雙版雨面紛涕洟是我平生居今何棄置之長跪我母前請

聽兒陳詞水來飛鳬鴈水涸長蒿藜旱澇皆不可徒煩母勞
思卽便理舟楫友朋送河涯相過念往昔相顧徒傷悲遠林
樹曖曖大澤波瀾瀾問我來何日浮雲無定期

孫豹人見問近況

枉作年年計仍然一畝宮賤貧生侮慢兒女困英雄衣競秋
雲薄顏輸晚葉紅門前淇渤是會有怒鵬風

西莊

只借莊西一面看荷花開徧又開殘極天路認孤煙細近海
風多六月寒老馬豈難辭棧豆翔魚端不慕綸竿寒來無那
蒼茫甚擊劍長歌興未闌

重至松岡弔葉紫台

黃葉清波照別離十年前景入安宜月明小縣城關早煙闊

長淮漲落遲古劍看畱吳季淚秋墳不唱鮑家詩松岡草露
霑霑在最是思君獨上時

種木棉花歌

木棉花種今年來鹵鄉潮水東南回治我繰車理我軸再遲
幾日花齊開朝出剝草暮出剝草草少花多草多花少經過
老農笑啞啞儂家只種黃花稻種稻不教婦子忙用稻易布
衣滿箱

有寄

小檻積春陰閑庭半蘚侵養花雲過厚藏蝶葉偏深莫易山
香舞須憐莊舄吟伴人雙語燕可一寄歸心

孫

浴

字沂公號彤池江都生詩宗香山放翁一時從游
多名下士程定先殿撰郭南江解元皆出其門率
年八十有六著

有奎聚堂詩稿

次汪爾耆看花二截句韻

鬢雪飄飄劇可憐
看花還趁艷陽天
珠璣筆底春無賈
不信光風屬少年

老態何心倚嘯歌
春光不放眼前過
輕鳧一兩香泥濕
入到花潭得句多

孫玉甲

字殿雲號雪隱江都人沂公長子以邑廩生舉優行知福建寧化縣熟於史事有讀史偶吟二卷

食荔枝

忠州圖裏憶年年
何意芳甘到綺筵
丹殼擘開珠馥郁
寒漿嚼破玉勻圓
春涵軟綠香如醴
韻寫輕紅句欲仙
日啖嶺南三百顆
老蘇風味有誰傳

朱

摺

字象山揚州人

喜晤王己山夫子

桃李門前附一枝重披絳帳覲光儀百無一是空憐我十有三年愧事師薄技漫勞宗匠許微名空被巨卿知宵來銀蠟春風裏深慰彭宣數載思

巴

鏊

字宗恪號秋函儀徵人太學生著秋燈集一卷

秋來

閒情難遣自年年每到秋來意惘然疎雨一簾香篆杳清風半榻枕函偏袷衣乍換還生感紉扇初捐亦可憐莫怪夜深貪坐久待看桂影月中圓

東志

字凝白號柿原江都諸生與弟沛思同居終身朝夕唱和吳穎長鏡贈以詩云却羨裴休家署裏一

門羣從共談經著

有柿原詩稿一卷

曉發常山

曉風收宿雨曲澗響春流雲退千山靜峰迴一徑秋酒旗橫

樹杪花葉上人頭詎惜程途遠嗟余白髮稠

東智湧

字沛思號柳塘柿原之弟以友愛著時人謂之二東有柳塘詩稿一卷

吟贈

高士幽棲處春深綠滿園閒花隨雨落燕子逐風翻几席足清趣琴書無俗喧軟紅揮不盡未得一敲門

廖榮懷

字湘晴一字禹門儀徵人著綠荔山房詩鈔四卷

江上漁灣故址康熙間通政曹公棟亭於沙漫州隙地建亭曰漁灣嘗集漁人捕魚於此二十年來惟存老樹數株而已

江上漁灣草樹平偶來憑眺不勝情鎖沈風雨亭無迹占盡煙波地有名荻葉漫抽春雨碧蓼花遙映夕陽明釣竿酒榼從誰問愁絕南山一柝橫

袁爾職

字肩山
泰州人

落燈後同人歸自都門小集兼懷田有君都下

紅燈竟夕醉餘輝談笑煙花二載違
且共聳肩春甕暖漫嗟
點額禹門歸村畦翦韭金芽嫩
江市尋魚玉乳肥爲問傳柑
朱邸客梅邊鄉夢幾依依

朱夢漣

字飲江
江都人

殘梅

巡簷索笑費清思春老江城又此時
瘦影春殘和月冷暗香
銷盡少人知窗閒嘈雜禽聲亂
樹底荒唐客夢癡懊惱東風
何太速閉門惟有睡相宜

朱學浹

字粹章號清
江如臯人

滄浪亭

背亭梅柳綠陰賒水畔芙蓉面面花倚徧石闌天欲暮亂雲都化赤城霞

解鼎基

字陽山人

渡錢塘江

錢塘舟一葉飛渡客心驚霸業自興廢潮聲無古今荒煙層樹斷黑雨亂山沈欲訪錢王廟江干半夕陰

汪從晉

字錫三號澹人先世由歙遷揚州遂占籍儀徵父

揚州親舊無不被其惠者久之聞於朝文廟諸鉅工祿寺卿以旌之從晉承父志踵行不輟嗜學耽吟咏手不釋卷父歿痛祿養不逮郎曹需次符迨終不赴孝行著聞載在縣志

夏日過木蘭院有懷撫生上人

諸天花雨落幡影動高風古院夕陽裏客心清磬中俗情消欲盡往事感何窮猶是東林寺無從接遠公

汪超寧

字綏遠號恬谷儀徵人從晉長子性至孝父歿悲

地不能起閱五月竟以哀毀死當事憫其純篤亦載縣志恬谷讀書東柯草堂有孤鐘破雨出幽寺敗葉裏風敲暗窗之句爲時賢推許

送劉南廬歸閩中

正好商風雅何堪一棹歸旅懷先曉雁鄉夢入斜暉月上寒林迴天空野水圍遙知富春郭落葉共帆飛

汪增寧

字友于號芸菴儀徵人從晉次子早卒

僧舍梅花

何處梅花發招提春又生香風山磬遠疎影佛燈明格與僧俱古夜無人益清最憐山鳥宿帶月半窗橫

淮海英靈集

鄉人阮元輯錄

程文正

字芴山號范村江都人康熙甲子舉人辛未進士官工部主事爲汪蛟門北部之壻年四十四卒子

夢星輯其遺稿爲水部遺詩一卷

采石李翰林墓

蒼蒼松柏繞層岑
謝眺青山葬翰林
天子呼來猶失意
世人欲殺亦知音
煙迷墓杏漁樵路
月照樓空江海心
鸚鵡鸕鷀杯勺好
死生有約酒星沈

病中謝京江夫子枉問

小草一出春風吹
長安日日容追隨
平津賓客每錯履
安昌經史時披帷
一從純孝請從制
時丁太夫人憂旋遭苦病歸
求醫金焦相望衣帶水
無由奉席同天涯
空齋故物一木榻
瘦骨憑藉晨昏支屋梁
仰望時自哂去病棄疾何人斯
平生讀書略

本草只今背誦無忘遺裏飯不足累子祀書帛何意來獻之
候門稚子昧禮數駐車不報迴軒知渡江兩槩疾如鳥菰蘆
風起何由追感恩知己古所歎救焚拯溺還深思方今爲魚
半淮泗要防千里生瘡痍公誠康濟活國手蒼生日望還天
堦一錢不直程不識甘學盧家賦病梨

古寺

蕭寺猶餘字空山路幾重磬寒孤澗月僧老六朝松定久龍
吟鉢齋遙鳥聽鐘殘碑如可辨階靜紫苔封

程夢星

字午橋號泚江都人康熙壬辰進士改庶吉士授翰林院編修太史少穎異弱冠以詩鳴迨入承

明宦情早淡丁內艱歸築篠園竝濟南別業以居不復再出揚州爲東南都會民物滋豐人有餘力當時名流賢士流寓者多太史主盟壇坫歷數十年詩分十集曰江峯曰分藜曰香溪曰楊餘曰蠡餘曰濟南曰五賦曰山心曰琴語曰就簡總名今有堂集附以著柯詞詩終於乾隆丙寅丁卯間年逾七十矣又著有李義山詩集

箋注

讀史四首

壯歲貴努力亦須慎其儀明鏡不藏耀緇塵恒蔽虧賈生在
洛陽早膺吳公知薦之漢庭上何難媿臯夔文帝守成主紛
更非所宜年少乃喜事遽爲絳灌嗤長沙一見斥弔湘徒傷
悲由來露才智適爲讒口資老成蓋國器養晦姑待時不見
豫章木辨材七年期

習俗易移人波流終無涯子夏謹篤士尚言悅紛華漢後去
聖久益復事驕奢石崇何如人珊瑚邁官家錦障三十里爛
漫明朝霞亦知利吾財過眼如空花晉世不鑒戒非分且有
加口腹奪乳哺用之飼肥羝高哉謝東山豪具禁萌芽請裘
乃與綿所以子弟佳

佳字從杜
入麻韻

人各有弓冶士惟一經橫蘇頌頗有子九重皆知名唐世尚
門地敦勉寓權衡制科途轍啟設網掩豪英惜乎王摩詰名
以琵琶成光範三上書昌黎亦紛營錢微知貢舉恕府至相
傾子弟貴苟得豈曰父兄榮九臯鶴則和長松風乃清翩翩
韓東郎雛鳳能蜚聲

交心如人面所見各不同學焉得性近豈必畔西東有宋開
景運五季迴頽風導源穆伯長擴以歐陽公大蘇所識拔萬
象羅織洪荆國雖異議不以文字攻後人拾餘唾遂列黨禁
中東萊與西山蒐選破愚孽鉅手始吐氣光燄垂長虹人勿
循世論著書任窮通

檇李客中對月寄故園兄弟

虛幌上新月高軒風露清故園花事好今夜在江城鄰笛聽

三弄村醪舉一觥可堪芳草路夜夜逐愁生

白沙翠竹江村十三詠

虛閣延晴光白雲飛不去沃衍江之濱布穀鳴春樹耦耕人

荷鋤村煙深處處

耕煙閣

山堂雙古柏偶立何蒼蒼風煙飽閒曠永辭斤斧戕衆鳥各

有託于茲栖鸞皇

香葉山堂

連延南岸山嵐光幻無已木落雙眼空天遠一帆駛高樓嘯

清風山靈同徙倚

見山樓

菑畬及良晨耕穫當樂歲潔志薦馨香孝思以無匱望古補

笙詩明發恒不寐

華黍齋

秋林已暑退落葉生微涼候蜚響空山中有叢桂香淮南招

隱篇千載遙相望

小山秋

東亭臨水際高柳鳴春禽
鯈魚來忽去溪水清且深
白雲時

孤飛澹蕩託素心

東溪白雲亭

林間一片石溉名非姓到積陰生
層苔蒼翠夕陽好桔槔本

無機俯仰亦天巧

溉巖

數畝種篠簹經春雨露足初篁解籜成
穉筍尚堪東客來坐

清陰何處有塵俗

篠簹經

英英未零落江上明秋霞弱質不自持
因風半天斜伊人遙

以怨言采芙蓉花

芙蓉洪

矯矯雲際鶴翩然落沙衍石梁橫水心
江海不在遠清暝警

深宵稻梁安足羨

度鶴橋

香界絕塵想跼蹐聊寄意物論詎可齊
莊生但因彼未若老

瞿曇無非亦無是

因是菴

山草春一寸春至非示恩山禽觸化機有如向我言嘿坐孤

亭中曠然天宇溫

寸草亭

雲去四天碧山月明似水修梧被高岡舉袂落梧子幽人夜
不眠秋聲疑在耳

乳桐嶺

夢中得花殘風韞春歸疾竹礙簾旌月上遲之句枕上
足成一律

黯黯孤檠照薄帷枕間強意夢回詩花殘風韞春歸疾竹礙
簾旌月上遲不盡愁懷難遣處無多酒力易醒時疎鐘又起
寒煙外虛過年華夜半知

乞王麓臺先生畫山水

馬蹄踏鐵車輾轉紅塵烏帽日奔逐長安風土苦低頭故里
溪山難到目一官那得及向平無已聊學宗少文望梅止渴

且自賺臥遊圖畫窮斜矐驚溪東絹白如雪好手難遇出復
輟山川面目須偉人當前幸有王摩詰吳中舊手稱二王廉
州安能望太常風流不墜得家法公會落筆中書堂解衣盤
礴久供奉一水一石今時重天下至寶宜自矜亦有成言天
下共湖州厭苦譏韞材願公耐事毋喧聒耳目近玩不敢論
要使江湖魏闕來

初築篠園

有竹近十畝
故以篠名

造化付福性卜築忻幽栖五塘遠城郭延佇塘之西清陰忽
到眼風來時高低猗猗十畝竹宛轉蒼苔蹊佳哉適我意足
以供扶藜夕陽自相度希鐫呼童攜野外無華屋茅茨開荒
畦柴門臨野水權援連長隄寬閒畱餘地種樹青鱗鱗昔者
竹林下傳有阮與嵇自顧非其人難免凡鳥題春秋集兄弟

餽餉有萊妻茫茫天地內永聽幽禽啼

篠園十咏

園在郭西北其西南爲廿四橋蜀岡迤邐而來可騁目見者栖靈法海二寺也上下雷塘

七星塘皆在左右因得夕陽雙寺外春水五塘西二語書爲堂聯卽以爲十韻之次

今有堂

謝康樂山家詩云中爲天地物今成鄙夫有何古非今卽今成有遂以名堂

林野有清曠天意闕荒僻偶然落吾手榛莽倏已闢長嘯愜

幽懷於焉樂晨夕

修到亭

環亭種子梅百本花下可布十餘席幾生修得到梅花謝翫山句也

誅茅面高阜種樹南山陽先春挺孤秀一一凌雪霜因之結

夙契竟體凝寒香

初月泚

池半規如初月植蒲菖蓄水鳥其中跨以略約激湖水灌之四時可不竭

蟾影纖如鉤下照白石淙向夕池上酌一瀉傾春缸鷗羣久

相狎來往時一雙

南坡

築止爲坡亂石間之當今有堂之南其高出林杪躡小橋而升

杖策過危橋拾級上空翠曲塍急春流前林出高寺遙見耦耕人攜鋤話農事

來雨閣

竹塢之西閣可眺可咏知舊能來當不間今雨矣

萬个羅清陰蕭散人境外舊雨時來遊一徑入煙靄風細殊不聞嘹然發天籟

暢餘軒

啟菴扉而入平軒三楹以觴以奕劉靈預答竟陵王書云暢餘陰于山澤託暮情于魚鳥

歸懷在山澤好景無冬春孤賞白日靜佳趣已畢陳永言暢餘蔭企彼羲皇人

飯松菴

堂之北偏雜植花藥綠以周垣爲偃息之所故多松其秀色可餐云

山客了無營提筐拾松子食之潤毛髮清芬味如水願與素心友共此煙霞髓

紅藥欄

芍藥以廣陵爲最近無好事者西軒新植數十木雖無奇種亦自可人

不見廣陵花一別歲云五豐臺擅奇艷所惜浣塵土歸吟紅藥詞移種及春雨

藕麋

欄檻之外一籬界之其外湖田百頃徧種芙蓉藥朱華碧葉水天相映毛詩麋與湄通

采蓮去東渡鼓枻下迴塘日晚歌聲起滿湖風露香落月冷葭葦夜宿湖中央

桂坪

暢餘軒多隙地桂三十樹移自白門密葉濃陰皆可愛不必花時也

天香發遙夜山月方銜西森森坪間桂綠葉含丹萸連蜷不自悶招我成深栖

議復保障湖舊蹟

誅茅近蜀岡東枕長湖曲每苦葑草繁頗礙鷗鷺浴昔聞此湖水淪漣千頃足豈惟利灌溉荷芰供遊目自種青泥芹遂

令沙嶼促販夫競刀錐勝蹟未易復憑誰挽清波貯此呀然
腹小艇時一來高吟倚修竹

將歸新安宿城南水閣

細雨城南去孤亭坐寂寥晚鐘明月院疎柳美人橋水闊寒
逾淨燈昏夜轉遙故鄉千里夢初路記今宵

題盧雅雨同年借書圖

十年軒冕一銖輕惟愛奇書抵百城董相有祠畱半榻下帷
猶似舊書生

時寓董子祠

微吟

蠻箋幾葉貯詩筒覓句多慚思未工行徧西廊人影瘦一痕
涼月上疎桐

小漪南詩

宋葉圭簿杞有別業於江吳滙築草堂魚鱗
漣上扁曰漪南王博士逢爲作漪南草堂詞

曰仁義是漁兮儻口腹腹不人累兮人誰吾辱丙申
秋余築篠園二十四橋之東偏庚申冬復構小亭於
溪上澄潭修鱗可以垂釣蓮房菱實可以樂飢既落
成仿主簿意以名之小云乎哉以果吾腹猶以爲大
也

吳淞別業憶前賢博士清詞亦可傳竊比穎昌營水竹小漪
南似小斜川

五貺樓詠五首

鹿門子以五鴻舟華頂杖太湖研鳥龍

余齋中無長物有洪源方竹丈一漚子琴綿津研五
其筆格味諫壺皆友人所遺王戊夏於齋前構小樓
既落成卽以此貺之題曰五貺樓余何足以方處
士雅思而惠贈諸君則鹿門高致也因繫之以詩

洪源方竹丈

洪源萬花谷去岑山五里許谷中多方
竹取以爲杖枝節稍短而方整明潤絕

勝天台
所產

洪源故鄉人惠我園中竹方外而虛中寶此數尺玉柱上蓮
華顛晴空寄遐矚

一漚子琴

一漚子明隆萬間僧悟言也所藏琴云賜道山其子以余素

愛此琴因寄贈

孤桐斲秋琴散音傳葛嶧昔聞奏雲門禪榻曾寄迹臨風時

一彈何似山陽笛

綿津研

綿津山人端溪研舊有銘舍人余葭白購得之即贈余

商邱研有銘胡爲落市肆舍人偶得之精英肯自秘愧我不中書永負良友遺

五茸筆格

雲間僧蔭寰有竹筆格中半剖凸其背滑淨如脂余以詩乞得之

梵夾安筆格形質何離奇老僧解吟詠余乃乞以詩還期山心室共參玉版師

味諫壺

天門唐南軒館丈齋中多砂壺有狀如橄欖者或僧共拙余獨謂拙乃近古遂持贈名之

日味
諫

義興誇名手巧製妙圓整茲壺獨擁腫贅若木之癭

呂申公木癭壺

詩嗟爾木之癭何異內有贅

一盞回餘甘清味託山茗

重訂箋注李義山詩刻題後

西崑無鄭箋遺山昔招悵況我千載下敢窺祕密藏失氏本
道源注釋未云創所惜作詩意蒙昧若煙障要非挾其微何
以發高唱時從獼祭外一洗優孟樣楚雨縱含情其義某竊
諒穿鑿固不免論說或非妄但求古人心寧避世俗謗想其
不羈才詎肯牛李傍君臣朋友間厚意深慕鄉美人怨芳草
遂至比浮浪豈知寄託深直追風雅上荆公是知己謂與少
陵抗杜箋匪一家往往共韻頗梅溪有蘇注司諫更精當譌
誤藉改定先後非礙妨欲招玉谿魂持此以爲貺

春日懷人六絕句

攜笈年年續舊遊
小山何事漫淹留
懸知掩閣攤書夜
紅粉

青燈泥白頭

屬樊榭鵲

寶帶橋邊春水漫
鱸鄉亭外布帆遲
不堪回首蕪城暮
腸斷

斑驩送別時

王梅泚藻時遣奴子故戲及之

楸枰著盡夜燈前
斂子匆匆又隔年
記取小江湖上路
春風

一棹剡溪船

杭董浦世駿

上車不落偏難信
卻曲無傷亦漫譏
爲問東陽腰瘦否
春來

莫減一分圍

姚蓬田世銓時顛仆傷足

浮家泛宅任飄蓬
夢隔勾餘東復東
誰識鮎埼亭下客
孤山

吟社小泉翁

全謝山祖望

搖艇新安去未還
故園花已點苔斑
不知清夢耽吟處
可在

西疇十畝間

方西時七歲

冬白紵效元微之

冰簾貯月寒不卷珊瑚鉤重銀絲軟一聲呼燭琉璃滿柘衫
飄曳官鞬跪西子筵前歌宛轉歌宛轉梁塵墜此際吳王心
已醉舞罷霜風生晚吹錦袍新樣常筵賜衣雖新妾猶冷
倒向君懷迴鳳頸雲髻鬆爲重整銅龍暗咽宵漏永斜倚
紅粧呼未醒

郭長源

字時若甘泉人
雍正壬子舉人

題巖谿歸櫂圖

巖谿無限好有客下歸舟暫慰邱園想聊同汗漫遊川迴一
塔迴帆挂萬山秋更羨陵嶒處橋橫最上頭

王文充

字墨濤江都人雍正癸丑進士
翰林院編修知浙江處州府

集補齋先生寓齋詠庭中老桂

藥欄矜絕艷誰復愛幽閑庭桂忽分詠秋風許共攀影曾森
皓魄老更傍屏顏忝繼羣公後閑情戀小山

王履吉

字坦夫一字
燕田江都人

春日憶澄江風景

黃田水帶鎖城腰北郭危樓近碧霄海舶人來喧晚市石梁
聲吼放春潮蠶筐漸滿收桑葉雉堞初高種麥苗社鼓逢逢
聞遠近一竿斜日酒旗飄

程盛修

字風沂泰州人康熙庚子舉人雍正庚戌進士改
庶吉士授編修尋遷御史乾隆四年擬詠史樂府

十二篇恭進奉
上諭輪進經史講義之御史程盛
修所進詠史樂府十二章指事寓規詞意婉摯得獻納
之意與泛論經史者不同甚屬可嘉著賞內用綴二匹
筆墨二種以示嘉獎嗣視通漕潞河晉大京兆以終養
歸籍晚年自訂所著詩稿爲夕陽書屋初編四卷而冠
所進樂章于首又次其歸養後諸詩爲南陔松菊集一

卷

咏史樂府十二章

斷罟匡

臣按微非時也魯宣公夏濫於泗淵里革斷其罟而諫公曰吾過而里革匡我是良罟也

爲我得法使有司藏之師存侍曰藏罟不如置里革於側之不忘也

泗淵漁里革匡斷其罟悟君王君王聞言三歎息阜物防貪
良史職有司藏之無忘規庶幾見罟如見革師存一言婉而
風置革於側無面從不見朝聽忠言夕委棄畱衣畱檻皆虛
偽前漢皇后宋帝

市價對

臣按過淫刑也齊晏嬰宅近市公曰子近市識貴賤乎於是景公繫於刑有跽踊者故對

曰踊貴屢賤公爲是省於刑

臣近市識貴賤我后知不知胡不採衢諺臨淄十萬生齒多
家家跽踊可奈何踊之價浮於屨不與咻誰歌舞仁人一言
省於刑頓教億兆無詛聲修德更不誅祝史海岱千秋思晏

子

辟戟諍

臣按裁近倖也漢武帝置酒宣室使謁者引

積思六經而偃以靡麗奢侈極耳目之欲宣室者先帝之正處也非法度之政不得入焉上曰善

東方生能直諫守法度黜靡曼何物賣珠兒敢容宣室宴辟

戟陳詞意氣雄侃侃尚有先臣風不見申屠嘉坐丞相府執

法猶能困鄧通

乘船戒

臣按勸持重也漢元帝欲御樓船薛廣德頓首曰宜從橋上不悅張猛進曰臣聞主聖臣

直乘船危從橋安聖主不乘危大夫言可聽帝曰曉人不當如是耶乃從橋

從橋安乘船危千金之子坐不垂莫躋於山躋於垤舉步何

必非嶮巇曉人言真可聽君不驕臣不佞霸陵西馳騁六飛

諫草能教馬首迴

撒屏悟

臣按防色荒也漢光武帝御座新施屏風畫列女帝數顧視之宋宏燕見正容言曰未見

好德如好色者
上即為撤之

屏風新畫美人美人顏色傾國姿君王顧之情為移情可移
即可誤賢臣獻規君頓悟不見精勤納諫唐太宗不畫蛾眉
書奏疏

侍宴規

臣按抑華侈也唐諫議大夫蘇世長侍宴披香殿酒酣謂唐主曰此殿楊帝之所為耶唐主曰卿諫似直而實多詐豈不知此殿朕之所為乎對曰臣實不知但見華侈如傾宮鹿臺非與王之所為耳唐主深然之

披香殿是隋是唐臣莫辨臣雖似詐其實忠不聞興主營離宮露臺百金儉德崇

從獵諷

臣按止游畋也唐諫議大夫谷那律嘗從出獵在途遇雨太宗因問曰雨衣若何得不漏對曰能以瓦為之必不漏矣帝為之罷獵

雨衣則漏瓦不漏諫議微詞規乃后罷獵從茲慎馳驟禽荒

垂戒古今同拒關不納羸馬供漢門侯魏筆公

佳鷹表

臣按杜徵求也唐太宗遣使至涼州都督李大亮有佳鷹使者諷使獻之大亮密表曰陛下久絕畋游而使者求鷹若陛下之意深乖昔旨如其自擅乃是使非其人上悅手詔褒美賜以荀悅漢紀

涼州鷹使者諷之獻王廷王者久不貴異物今日何與昔旨拂君無荒臣有表悉索徵求慎微小旅獎入貢載周書世間玩好無時無

宮體箴

臣按黜浮靡也唐太宗嘗作宮體詩虞世南曰聖作雖工體非雅正臣恐此詩一傳天下風靡不敢奉詔

帝曰朕試卿耳

宮體詩廟堂首倡瓊琚詞詞雖綺麗體不正天下靡然歌咏之朕試卿卿果諫同時尚有王師且翠微宮頌不入選

用筆喻

臣按端心術也唐柳公權爲司封員外穆宗政服嘗問公權筆如何則盡善對曰用筆在

心心正則筆正上改
容知其以筆諫也

用筆在心不在筆結密矜莊露神骨司封員外侍書來片言
足使君心一萬幾操縱總心生落筆端人正士形平原太守

顏真卿

觀燈諫臣按陳民虞也宋太宗以上元御乾元樓觀萬事麗理每念上天之賦致此繁盛呂蒙正避席曰乘輿所在士庶走集故繁盛如此臣嘗見都城外不數里饑寒者甚衆願陛下親近以及遠蒼生之福也

乾元樓賜神京樂熙攘慶太平太平有象張燈宴君樂須教
民樂徧焉得綺羅筵前千萬燈照見九州葦屋鵲鳩形

三司告臣按慮盛滿也宋眞宗初卽位陳恕久領三司常命係具中外錢穀恕久不進屢詔趣之恕對曰陛下富於春秋若知府庫充實恐生侈心是以不敢進也帝嘉之

領三司掌錢穀胡爲不入君王目春秋鼎盛府庫餘豐亨豫

大非良圖不見朝無先識李太初祥符中葉進天書

諫院紀

恩詩

勲華天子垂裳日

特許昌言達

九霄

聖德豈猶資土壤

謙衷端不廢芻蕘細旃廣廈憂危切側席翹心法戒昭染翰
各能抒底蘊一時懽忭慶同朝

奏牘由來喜吉祥諛言不進感吾

皇四方水旱陳

丹陛萬姓恫瘝入皂囊已爲時艱彌罅漏更於古訓見羹牆

殷勤問學儒臣事誰道

生知亦就將

百結寧堪綴

袞龍轉教聾聵警洪鐘

王言溥博施無倦

聖度包荒大有容

諸臣進奏有識見拘攔者必從容前席召對訓示紕繆者亦曲賜優容

中宵傳漢帝更番迭直紀唐宗何如簪筆論思日

指授親承到

九重

朝擎封事候雞人敢冀葵衷動

紫宸

華袞榮褒傳上相

時桐城錢塘兩相國聖旨嘉獎文章光價播詞臣

詩交

南書
房絲分銀漢

天家錦紙落煙雲

內府珍半世耽吟空抱槩今番溫渥被

皇仁

送同年諸庶常隨總憲溧陽史公宣諭陝西

天威震疊西人恐厥角稽首不旋踵吾

皇欲以德服人家習詩書戶姬孔御史大夫惟汝諧望重青
蒲威赤棒此番駿厲且無庸特遣詞臣昇光寵不矜口舌欺
流俗惟以訓辭當戒董多士斷斷奉矩規居民各各安耕墾
父慈子孝敬長官不見催租來赴隴公門如市亦徒然誰辨
賤屨與貴踊凡茲實效非空言萬民環聽神爲聳歸來奏對
明光宮挽回風俗資仁勇日照潼關四扇開看君牙纛前驅

擁一戟書生際會時欽哉莫負

君恩重

陳定先領袖南宮旋登狀頭作四絕調之

五更聲徹六街頭英妙輸君第一籌傳徧洛陽光價遠卅年

重與說揚州

謂樓村前輩

三載淒涼冷署秋此番高出衆仙儔教官金榜非難事難在

蓬萊最上頭

教官金榜掛名時諺語也

馬上昂藏七尺軀風飄弦管溢通衢捲簾紅粉知多少盡道

鬚鬚頗有鬚

雄姿英發妙初時三十卿材認本師衣鉢相傳作公輔到來

已是十年遲

衣園先生以亞卿左遷分校年甫二十九君今已三十九矣

西門觀落日歌

丁未下第留京師禮南繆公屢侍談讌爲述居鄉時與姚君西夢黃君儀通

郊外之游每夕陽在山紅紫萬狀則徘徊不能去有
西門觀落日歌今忽數十年矣余請公詩讀之而
粹不可得昨檢餘韻鈔本亦復不見此詩佳句遺佚
古今同慨已已假歸西郊縱步返照入林偶憶公言
漫成長句非敢僭擬公詩亦非專咏落日
語云對此茫茫百端交集余亦同此情也

秋卿下直談鋒起爲溯江鄉林壑美西郊一帶足徜徉日落
未落光銜水此間知己三兩人鋪茵藉草笑言眞浩歌一曲
寫胸臆白日已匿天無痕一自驅馳事京國天門日射觚稜
赤舊游回首總茫然不見當時苦吟客酒酣迫欲把公詩南
陔華黍亡其辭我亦緇塵三十載日車難駐流光馳歸來迤
邐西郊路彷彿仙翁吟眺處姚黃一輩逐飄風獨立蒼茫煙
景暮

同年顧震滄

棟高

以經學授少司成

召見稱

行復膺

龍錫索詩為贈

千佛曾通籍依然理釣緡非官能奪志有母足安貧稽古忘
寒暑殊榮用苦辛一言資拜獻風俗未還淳

召見時
棟高所奏對

迎

鑾紀

恩詩 乾隆三十年二月

身在江湖望

紫宸歸來兩扈

屬車塵傾陽已得瞻

顏近反哺難言報德真卜爾期頤

恩廣大

上云爾母九十外精神尚好
恩昭茲翰寶骨嶙峋
是有百歲過的隨即叩頭謝

延景四字扁額

微臣拜手披

華袞早有榮光燭海濱

輦轂依光尺五天桑麻雨露奏章便自慙宣力當垂老不道

投閒又四年帳殿更番同豹直周廬環衛入驚聯定例終養班大與現

同任玉堂清祕成前度

記憶重霑

主德偏上垂問 做翰林幾載

蒲柳心情逼老蒼仰邀

天眷語琅琅

九重乍見鬚初白百爾猶傳鬢未霜辛巳冬入覲 天顏 鬚尚全黑 上問會

染白否今番鬚已蒼然復問及仍有不甚白之裏已分晨昏依子舍豈無夢寐到巖

廊閒居何事勞

清問

上又問家中閒著何事對以課子課孫因備問幾子幾孫有出仕者否

飽食棲遲鮮寸

長

清白平生仰

聖謨兒孫繞膝樂桑榆五車書已承家學二頃田無報

國租得

旨還歸溫諭好重聞宣喚

笑言敷

十六七八等日在天寧寺同去次日復於馬上呼名促歸者再

行宮侍班

恩諭皇仁體恤

真異數也

交衢嘖嘖稱榮遇謂此能夸野老無

榜後大挑選歌

宮中聖人夜不寢一夫失所心廩廩況今不薄讀書人肯教

落窮無諗當其歌鹿鳴而來雄姿英發鋒稜開三十流光

如電掣形容變盡精神摧及其老也足可惜百里才難借前

席曷不乘茲膺力剛功名得寸而得尺

帝心體恤入毫芒疏壅導滯何多方上者早膺民社寄次亦車服窺宮牆其他丞倅無不有朝夕亦得沾五斗差勝長安乞米時疲驢破帽霜雪走

詔書甫下舞蹁躑也當春風得意年水驛山程千萬里相逢多是孝廉船我謂爾曹須努力爲下爲民上爲國夷中之詩春陵行書諸座右長歎息鞅掌劬勞分所當整齊教化職其詳處士虛聲從古誤莫任擲掄起道旁天高聽卑置郵速幕府知人無枉曲包苴難免漏彈文闕冗幾會汗薦牘用是作歌歌作箴送君慷慨辭山林好將製錦冀黃手上荅宵衣堯舜心

吳宏謨

字虞三號方集江都人

春晚

無限離情玉簫中家山遙指亂雲東疎梅香冷千村雪野客
春歸一棹風明月獨隨清夜寂殘陽半落遠天紅將來通問
殊容易嘹唳沙頭有塞鴻

吳宏訓

字耀文號舸亭江都人

月夜過艾陵湖

客路逢明月扁舟夜過湖雲閒浮水淨樹遠帶煙無破網懸
衰柳殘燈入亂蒲榜人知客意橋畔酒先沽

曉雨天池歸棹

霧散天初霽輕帆帶雨開水因新漲闊人趁早潮回密柳叢
沙岸秋雲擁戍臺遙看捕魚者小艇破煙來

吳宏雋

字書永江都人

襄陽懷古

峴山秋望草萋萋落日荒涼古大堤
三顧何人揮羽扇六朝舊曲唱銅鞮
籬邊色老霜前菊城角紅生雨後霓
家在江南數千里塞鴻歸處海雲低

南巖

傑閣看山夜不扃月明山色入疎櫺
千尋挂壁瀑泉白一徑到門杉樹青
前代小亭仍碧瓦何年仙客守黃庭
短衣欲荷長鑣去獨向幽巖刷茯苓

同潘燕邱張苦竹雨中靈山寺看杏花

寺卽岳武穆故宅

古殿無人噪暮鴉青山猶繞鄂王家
低回六百年前事細雨空庭落杏花

暮雨過鹿門山

一江濃霧起寒色滿秋林欲拜浩然墓亂山何處尋空傳雲
夢句誰識鹿門心余亦狂歌者栖栖古漢陰

送趙丈念昔歸長沙

白豆花開晚霽天呼樽同醉短籬邊娟娟一片僧房月曾照
詩人十九年

林樹宗

號鍾奇儀
徵人舉人

題因樹樓詩

室以人增重花緣德倍馨栢樅畱舊澤樓樹總芳型孝思常
相屬生機永不停一枝繁豔處千載卜攸寧

徐攀龍

字利人號臥雲通州人性豪邁喜結納飲
酒賦詩年五十餘卒于蜀中著臥雲剩稿

暮鴉

何以日將夕竟無巢可歸寒能驗風信老未息塵機盤陣雲

俱黑爭枝葉亂飛是誰成晚眺倚杖立柴扉

春日病起喜晤張桐君李參竺于聽漁館

青山未許一提壺煙雨蓬門長綠蕪病久故人常在夢天晴

春鳥忽相呼貧無依倚家輕徙

桐君移居漁灣

老有交遊客不孤

謂參

竺溪上草堂攜手入風光未覺眼前殊

題友人紀遇圖

小樓人靜雨絲絲欲結同心折柳枝折斷柳枝腸亦斷年年

江上怨春遲

黃

卷

號楚士江都舉人

題因樹樓詩

盤錯年深見性真松筠心蹟足千春却嫌勢面空多事高節何須在異人

剝啄無聲可到門
小闌干外綠陰繁
不教白日堂堂去
花裏攤書自課孫

孫

輻 號玉峯江都諸生

題因樹樓詩

層樓高敞暮霞平
有客登臨倍感情
雲影已隨慈範遠
鳥聲猶繞畫闌鳴
傳經窗下春風裊
種樹階前夜雨生
畢竟本根培植厚
花開十里發新英

周

祥 字伯祥通州人砥行勵操隱處海濱自號滄浪漁父著滄浪歌四卷

扁舟

踪跡如秋葉生涯託水濱
微波雙槳綠細雨一帆春
柳下時橫笛蘆中間渡人
風開隨鳥去明月滿前津

朱

純 字東谿儀徵人

吳宮如歸自京口東城話舊

與爾清談興自殊
風鴉散盡水鷗孤
淒涼莫問別來事
荷葉一池霜打枯

古

斌原名典字慎五一字廣樓江都人與吳一山楷江松泉是爲詩友著有廣樓詩集

東黃尹東

聞道謝康樂時時山水間
酒酣扶阿段詩好付嬌鬟
江左一痕月淮南千里山
懸知遙念我岑寂閉柴關

題虎林僧壁

禪關闔無人孤客寄行旅
落葉走空庭蕭蕭來暮雨
兀然欲生愁風搖塔鈴語

蜀岡秋望

縹緲飛樓上凭闌得大觀
亂松欹古色一雁落新寒
江入淮

流細岡迴蜀道難憑高招野鶴孤唳下雲端

黃元焯

字潤山
泰州人

嘶馬客舍書壁次抱甕軒舅氏韻

白板扉開綠樹間江村事事助清閑爲貪睡味常橫榻才放心閑得看山破我旅愁花窈窕驚人曉夢鳥懸蠻此中自信能容懶鋤土編茅請署關

高

詣
字次庸一字
坦園泰州人

北垞先生昔游南梁嘗與焦子東長倡和茲復來而東長歿已十載矣因題一絕句見示遂次其韻

相逢海上話離悰廿載存亡一夢中太息故人邱壠在石楠花發夕陽紅

張

銓

字木菴
泰州人

塞上曲

天涯盡處夕陽低
萬里黃沙路欲迷
望斷故鄉何處是
行人今在玉關西

吳鴻紳

字笏安一字秋崖甘泉人

霜降後一日泛舟野望

昨夜霜初降
新寒漸漸生
塞鴻翻亂影
林樹老秋聲
野水迎孤棹
斜暉上古城
篷牕凝望處
蕭瑟客心驚

黃于詠

字芣青一字桐莊儀徵人

題家弟北垞滄浪漁笛圖次元韻

長笛一聲天地秋
蒼茫何處著漁舟
憐君擲得江海管
到老猶擔萬斛愁

俞

燾

字爲光號知莊泰州人著有落落吟

山行

萬疊峰巒濕翠橫
分明人在畫中行
驢疲却喜能知路
山好何須更問名
倚日孤松懸鶴睡
入雲古木挂泉鳴
悠然世外饒幽趣
隨處勾留遣俗情

秋夜

寂寥枕簟兩悠悠
雲淡風微夜色幽
竹倚窗前千个玉
月橫天外一痕秋
清砧散處孤城冷
黃笛飛來滿院愁
自欲放懷偏刺促
是誰把酒獨登樓

聽鶯

樓外風清日正遲
春光潑眼夢差池
聽來黃鳥雙雙語
知在垂楊第幾枝

沈光祖

字敬儀
泰州諸生

九日客毘陵陳栩亭見招卽席分韻

老去鬚眉別後真多君旅邸慰佳辰餐分苜蓿知官冷囊剩
琴書笑客貧九日蘭陵增慷慨十年萍梗各風塵故園風景
黃花瘦清影依依念主人

陳

倓

字定先號愛川江都人康熙庚子舉人雍正癸丑
會元狀元授翰林院修撰充

冊封安南副

使

正一品服

賜

孟冬朔日

頒朔恭紀

淑景開陽月飛灰叶應鐘一元貞下起火化冶中鎔
宵旰心欽若羲和志協恭玉衡窺舜陞

寶籙錫堯封赤道程南北黃纒紀夏冬允釐熙庶績成作勸
三農奉朔風同嚮來王澤更重泰階調玉燭賡拜慶時雍

病中作

一自蠻煙瘴雨侵

冊封安南染瘴回涼

不堪精力日銷沈莊生怛化觀

原達陶令遺言意最深此日空中聞甲馬他時遺挂痛人琴
殘編檢點應成帙千載誰爲一賞音

吳文璧

字秀東江都人

採蓮曲

小姑年十三初上鷁首舫學得採蓮歌未敢高聲唱

濕雲天外飛涼颺牽裙帶不愁晚雨來自會張荷蓋

鄭永和

字宮聲江都人

雜憶詩

呢喃雙燕語檐牙春色瞳瞳日未斜憶得美人深苑裏淡粧

羞殺海棠花

六枳籬門傍水涯相將吟到日西斜蟬聲斷後蛩聲咽風過
秋香白藕花

冶春詞後已蕭條花外何人弄玉簫剩得秋來可憐月夜深
和露濕紅橋

閔

畢

字廉風一作蓮峯江都人詩骨清秀有神與張漁川馬秋玉方環山同時爲詩友著澄秋閣詩集十

卷二

雙烈詩

一爲儀徵朱世蓮原聘妻方氏
一爲江都陳國材妻周氏

赤剎忽駕緋衣下杳杳簫聲雌鳳寡杜鵑啼血背東風枕函
暗漬珍珠瀉生憎燕燕羽差池春日營巢畫棟飛猶自強餐
青竹實可憐長憶碧梧枝瓊消粉瘦無顏色七載言歸思比
翼從茲絕粒赴重泉只恐相逢不相識

竹竿有節枯青春幽房鬼火光燐燐豈無三尺淬秋水毀殘

自惜非完人單牀輾轉飢腸吼眼裏空花大如斗金銀檢得
嫁時奩不著耳邊吞入口兩眶淚盡胭脂紅玉骨一把雲鬢
鬆魂兮魂兮渺何許亘入長天爲白虹

重過田隅草堂有感

舊識溪邊路草堂疎竹籬樹成人去後秋老客來時白鷺一
雙影枯花三兩枝裴回欲愁絕鄰笛正孤吹

屠家女

屠家小女作小婦不愛春風好花柳頗諳數米與稱薪日奉
大婦猶奉母大婦一夕泣且言我老更嫁非所論年華十八
正如水當求佳偶爲汝婚小婦低頭不忍應只自燈前勤織
紵明朝大婦向東家已受釵銀一雙聘東家有嫗來始知一
哭痛於初嫁時須臾嫗去戶已閉再拜亡靈從此辭劇憐白

練高懸處空梁卽是黃泉路貧家姓氏人不聞但識阿師橋畔住

過環溪

移門當竹逕插柳護山田野水明籬外疎梅落檻前朝來課春作客去理殘編不信歸林下郎官正少年

題梅泚所輯廣陵倡和錄後

三度飄零過此都一篇輯錄費工夫也如河嶽英靈集不是張爲主客圖大抵好詩在林壑可憐名士滿江湖慙予十載同酬唱竊恐他人笑濫竽

過峨嵋院

峨嵋院獨峯上人住持所也予每歲暮春來遊眞州必詣獨峯吟咏竟日此邦人士多與

俱焉前年洪寶田卒去年王汾山亦卒今獨峯又亡感今悲昔遂作是詩

年年三月此江村今日重過不可論爲哭故人驚白髮況逢

蕭寺欲黃昏蒼苔舊徑無行跡春草閒吟自掩門莫待題詩感疇昔眼前風景已銷魂

蒙谷采茶歌

蒙谷在蜀岡後唐時貢茶有春貢亭

蒙谷中間三兩家滿園茶樹是生涯雨前嫩葉從教賣官裏而今不貢茶

報春小鳥一聲過茶園采茶人唱歌近日種花兼種柳此中茶樹已無多

晚春過讓圃

逕曲多幽草林陰有白雲自同南郭隱不用北山文野色空樓得高花兩院分劇憐春晚晚蜂蝶尚紛紛

方士庶

字海遠號小師道人其先歛人生長江都幼年學畫山水從事于黃筌古後臻精詣迨有過之其得

意之作皆鈴偶然拾得四字小墨印與馬嶺谷閑玉井爲詩友內府纂修石渠寶笈曾以其畫入錄著有環

山詩稿三百餘首既沒閱玉井選
刻七十餘首爲環山詩鈔一卷

秋夜盼兒子家書不至

坐久月當戶露涼侵鬢絲江湖新雁少遊子達書遲拂簾不

成夢倚欄無限思螢光忽明滅已近授衣時

內府石渠寶笈土庶畫山水

冊第五頁會題此詩入竹林曲榭梧桐秋月幅中

甲寅九月南堂先生歸里計日抵家見憶代書

去日旅愁盡歸時樂事偏秋餘黃葉後人到菊花先城郭驚
鄉土妻兒說墓田從來爲客久此別只經年

和閔廉風二月十三日夜登平山堂便過絳圃元韻卽

贈陸淳川司馬

鴉歸燈火散山月淨浮塵林際一雙鶴水邊三兩人江光疑
極浦露氣覺疎巾可似王摩詰孤吟華子春

夏日過馬氏壽寧堂賞餅荷觀壁間金焦石刻因憶兩

山舊遊用坡公金山放船至焦山原韻

涼堂六月深耽耽壁開北牖戶啟南一主一客避炎暑

謂汪恒齋

馬半查

是會未滿人十三

會中原十三人

金焦石刻共題詠而我自分

絲盡蠶杼窠大字列兩壁弩張劒拔須無慚憶昔尋訪瘞鶴處俯身直探蛟龍潭更思妙高臺上立江天一覽清興酣于今揮扇對墨榻松寥海嶽恣閑談閑談冷淡灑冰雪蓮花供客如禪龕況復茶香煮龍井五泉未遜中冷甘納涼差幸遠塵囂呼吸清氣何其貪感君高誼報君畫南徐筆派吾猶堪待畫江聲何處好看山樓上藤花菴

五貺樓

程香溪太史讀書處

小樓曲折仙人路

額

大字先生書憑闌風起秋瑟瑟吟咏

不與塵俗俱先生手指衆目集拄杖臂格琴硯壺云此五
觀止矣選韻合作來無虛嗟我畫事昧六法紅絲枉滴銅蟾
蜍湘江半幅剖青玉指強腕弱多牽拘操音未審年未杖煎
茶或解親竹鑪但喜清畫伴閑暇墜露焉用增流餘乘此寒
桂正萋茂暗光樓影飛雲孤五美之傍復一醉圓月正挂城
南隅

方士憲

字右將號西疇洵遠之弟爲邑諸生著有白華樓詩鈔四卷

書朱順發妻劉氏事

存孤世所難紀載緬往傑舍已以從人鬱積肝腸熱嘉哉鄧
伯道遺子獨全姪嬰杵匿孤兒不令趙嗣絕阿劉巾幗流猥
在臧獲列乃抱忠義心事與古先埒當其主母亡五內慘崩
裂七子悲凱風一家具衰經黃口紫胞兒煢煢贅疣綴乳哺

藉他人安望壯且茁抱歸果羸弱哀音似鷓鴣揆厥致疾由
知緣乳潼缺見者咸酸辛聞者亦慘切劉獨重踟躕何計全
孤子肯不奮力救荏苒就夭折回頭視阿囷肥膩白勝雪精
血縱有餘詎堪兩兒啜情急智忽生義重親可滅忍痛須臾
間恥共儕偶說潛步出城闌橫梁綠波截水石聲哀鳴母子
情永訣委棄道路旁迫近魚龍穴世應譏其愚此甘計之拙
匪是恩莫酬遑恤心如結歸護持幼主吞聲泣嗚咽衆訝貌
改常屢問情始泄舉室感其誠相看淚流血迄今思往事過
眼才一瞥主慶室家完婦歎形神竭溯彼義憤時寧博羣情
悅有志事竟成所貴在勇決孰謂婢妾行黃羅襪迴別翻羨
女史箴難爲匹婦設世豈乏須眉幾輩衣冠竊矢口談詩書
矯行厲名節憑藉六尺孤變幻三寸舌梗直若阿劉孰敢與

頑頡矧復所天喪終身秉貞潔行年今六旬坐見躋大耋安得賢有司特將大義揭

旌詔責衡門烏頭雙棹楔

任大椿

字幼植號子田興化人乾隆己丑二甲第一名進士授禮部主事轉郎中山西道監察御史與戴東

原邵二雲諸徵君同纂修四庫全書然蔡繼晷館中提要多出其手早年博極羣書以詩文名繼乃窮極經術於小學制度尤為精覈所著有升服釋例深衣釋例字林考逸諸書詩有子田集錢香樹侍郎謂其樂府思精體碩王西莊閣學稱其五言清風遠響八韋左司柳儀曹之室

青陽

駕彼蒼駟時臨總章占人縮咆羅彼椒漿厥明燔柴歲星皇皇太皞之德當發若藏木精觸地氣達句芒命我司事用格

青陽

朱夏

火運蕃昌品彙畢遂百物負靈軋力於地嘉雨旣沛氣無沈
滯擢日披風玉華金穗璧贊陽光肅將禮祀燎薌晻曖昭升
赤帝

西灝

金飈宵振霜落斗高物盛而返生息其勞氣所必耗澤不能
膏歸華于實外剝中牢秋昊澄素嚴威用昭肅肅建祀掘坎
燔骨

元冥

吉日旣筮載祀顓頊佳穀畢登太祝以告水骨旣堅土膏旣
沃息陽於陰用無不足冥霰霏霏涼風肅肅猗歟至德萬物
斂育

天馬

天馬來陰山道逐黃埃喘白草天馬來自回中奮虎脊負長虹
天馬來炳房精馳月窟瞥無聲天馬來翊紫幟逸足騰精魄
變天馬來排帝閭蹈且舞黃頭郎天馬來不遑息逝乘女
俯西極

天門開

天門開光煜爚流紫壇輝日絜仰帝闕橫斗杓珠煥黃相璫
錯皇駟騫騰格澤同薄歷次十二畢會其絡拂鉤陳九旂翻
游極下闕端門圓靈躍乎金穴羲曜起於天根火齊爲堦玉
砌垣中有銀潢貫其藩乘雲輶駕鸞輶裔裔詵詵往若疑神
光滌蔚臚所知如歷中垣卽靈威金薄華蟲擢鈴綏丹書綠
字天語奇用褱姬德錫乾儀聿撫九有萬億期

后皇

后皇承宇撫豫我人萬彙咸若帝握其鈞烏弋黃支羅縷而至厥贄伊何朱鷺白雉

白蓮花歌

穀文小蹙蘭橈輕瑠璃匣淨天光平池塘十里半楊柳輕綃飛入芙蓉城家在若耶溪裏住還向清風懷白苧碧煙消盡月爲魂夢斷冰霜起寒素中流何處吹參差江北江南空暮思就中疎韻誰特絕一枝獨背斜陽時洞庭帝子音塵闕水盡天長澹將沒吹殘翠黛弔明粧滴盡紅珠剩香骨誰倚歌聲蕩酒樽秋光鏡裏易黃昏欲託微波寄情素鴛鴦脈脈花無言

平望道中

出郭星已闌解纜潮將歇燭滅蒲塘深去棹何忽忽宿酒破

餘醒西風吹殘月乍別易懷人欲寐屢搔髮如何將客心一棹雨絲白

葑門放舟一夕抵嘉定

役役逐昏旦泛泛親菰蒲胥江滯春雨少霽復長徂漸覺客情淡宛在脩竹餘乘流玩浦澈寂寞煙景晡殘夢落何處蓬角星疎疎洲盡屢迴復嚈城儼前途及郭帆影落曙色起林鳥

春日東懷王叔華

咫尺山河見面疎游情空似馬相如懷人夜雨搔雙鬢孤館桃花到尺書贈我明珠藏錦篋知君歸夢在園蔬芳洲擬送江南棹更向春風問起居

樊噲劍歌

距興化縣城南十里許有噲墩傳噲駐軍處後穿渠得劍一亦傳爲舞陽侯物父老言之

甚悉余
爲作歌

舞陽遺劍天下良銘詞斷續久其詳
敷厥喜聞故老說犀渠
鶴膝安足量南郭隆隆鬱高阜曾傳漢將屯
軍處使者穿渠
不記年掘得畱犁力難舉須臾熠煜神光流
紛紛繚繞杳莫
求精氣盤薄石爲裂得勢一躍看純鉤股長
三尺縱有理中
鋒剡剡鐵花紫巖飈倒激鳶鷗愁橫倚霜郊
萬人視苔斑剡
盡寒芒開層濤入壘捐纖埃芙蓉鏤碎白虹
走更鑱一角天
河來壯士拔鞘秋瑟瑟欲捽其鋒詫無質蚩尤
爲匿古月魂
却向鮫胎呼不出臘間剝蝕轉可捫龍文蟲篆
交細縕當時
斬敵幾千級入地血澀沈沙痕玉欄峻嶒銀
鑿縷背上貪狼
七星吐豹髓淨膩蟊螻蟻堅接金團絲蝕秋
雨河渠使者何堂
堂衆中起舞揮流黃却命材官貯官府到今
不受私家藏舞

陽軍功一當十殿上昂藏善爭執從征曾諫畱秦非視疾何
辭排闥入勢親寵逼讒言張黨呂滅戚豈衷腸韓彭趙醢禍
方烈陷此讒鋒功誰償此時利劍應在手爲請先誅賊臣首
壯士鴻門誚項心併作孤光照牛斗久同寶鼎沈河汾魏文
七劍徒紛紛金精知己厭膏血悔不早出從朱雲

抵毘陵

川途日夕已忘疲酒近毘陵醉更宜久客情隨流水淡思家
人到晚秋時孤村月露清鐘起十里菰蒲一棹遲欲向勾吳
訪公子江楓搖落閉空祠

李道南

元作傳云李先生諱道南字景山號晴山先世由

疏於持籌好施與家遂貧母早卒無子先生與兄雷皆
側室胡氏出先生既孤胡太孺人以女紅撫之讀或勸
理舊業太孺人曰吾將以貧勵子學不願使從富家子
遊先生既補儒學生員以學行高子時所居草屋數間

冬衣葛行者夜分猶聞讀書聲學使者重之有寒氣逼
人之歎學官吳銳李安溪高弟子嘗借客過其廬講學
逾時太孺人解敝衣穴屋後席壁屬鄰媼質錢市盤殮
享之遇斷炊輒貰市餅以爲食先生屬文必以微言發
經義恥爲華靡常曰文以勵行若視爲科第之階未矣
故試屢不中式貧益甚然雖餒臥不妄受一錢乾隆己
卯省試以第八人貢禮部辛卯會試中式第二榜初發
總裁及同考官知先生名願早見且招致之先生不往
既重總裁莊力耕閣學士以東獨招先生往論學術相契
愈深謂先生曰子之學問人品予知之矣顧甚貧何以
歸子將命同人贖子先生固辭旣而車馬至先生館舍
致贖者甚衆先生知其意概謝之閭學士聞而歎曰介
至此乎先生例選知縣不赴選設教鄉里生徒數百人
元十七歲執贅受業嘗主泰州通州淮安書院講席先
生穎敏過人而操行剛正以古名儒自勵對策剴切詳
盡事母孝事兄悌所著有四書集說十二卷太孺人將
卒執先生手曰還是讀書先生以是語名其堂太孺人
鍼黹數十年遺斷鍼盈篋先生每撫之泣海內通人名
士爲詠其事先生錄爲斷鍼吟一卷凡雷亦善屬文旣
沒先生輯兄文及先生錄爲斷鍼吟一卷凡雷亦善屬文
隆五十二年卒於家年七十有六子二木善元善

答荆刺史貽詩並示書院諸子

民生有三事君親等於師自問何所有文行敢自欺禮隆責
亦重將何以告之念彼曠職者厥官名曰尸教學非無祿爲
政卽在茲驚湖經術治白鹿統緒遺仰慕古賢哲何止百世
規而我未學子抗顏擁臯比章句雖略親但拾毛與皮清濁
雖略辨不過虛車辭作人無實用家國何所施率爾當斯任
猶豫而狐疑所恃愚且直小大無敢私勗之以忠孝修德在
樹基戒之黜浮華造道惡趨時王伯厚先生謂後學去一時字方可造道廉恥尤
所急立志忍寒饑庶幾閑大德鸞鳳不化鴟處爲子弟孝出
爲父母慈敢云盡良士良士亦有裨持此謝知己暫作他山
資若云久於此此席非兒嬉勉旃更勉旃三復河干詩

五十自述

五十父生我我今復五十生男只如此顧影堪於邑

一解來日

不苦短去日不苦長親亡始愛日墓木悲蒼蒼

解二

父願兒爲

儒母願兒爲儒爲儒幾餓死不及反哺烏

解三

葛衣母禦冬溫

被被亦朽母沒兒衣煖兒煖親知否

解四

父書亦盈箱母鍼亦

盈篋欲啟不敢啟心病雙手招

解五

一巢生數子羣飛不竝集

有子戀舊巢哀鳴亦何急

解六

貧賤離親戚妻子以爲友再彈

弦再絕何以慰衰朽

解七

舊巢旣已毀何日營新巢因貧轉藏

拙不使後人嘲

解八

文章亦自知得失操人手敝帚享千金聞

者掩且走

解九

却行那得前妄行失故步少小負師傅老大悲

歧路

解十

高適晚工詩伯厚晚篤學古人非速化功在果而確

十一好學不厭老鞭後補其初屈指數甲子可讀十年書

解十一

別梅

手植江南第一枝，半生心事有梅知。
可憐似我清如許，誰更同君冷若斯。
玉骨自應邀愛惜，吟情莫解慰離披。
攀條欲別魂銷處，無計相畱淚謝之。

羅兩峰

聘

爲寫別梅圖次前韻酬之

歸鳥從來戀故枝，多君寫出幾人知。
生香不斷香如此，樂意相關意在斯。
三絕高風癡獨賞，二難逸韻妙同披。
謂羅南文章圖畫堪千古，若得黃金合鑄之。

自題小照

破屋三間自授書，日長天濶興何如。
私憐老去無多力，偷得工夫學灌蔬。

少年裘馬日輕肥，笑我臨風未奮飛。
枝痒媿無長袖舞，金門四謁已知非。

漸漸秋風老被欺閒中歌笑倍淒其人生各有傷懷處不爲
莼鱸結遠思

雅難入俗何曾雅狂到客人不厭狂識得廬山真面目穠纖
何必襲時裝

看梅

照人顏色玉光寒心似孤松氣似蘭深夜月明人獨坐此花
須向靜中看

喬椿齡

字書酉祖籍山西襄陵自前明來揚州業鱸遂占

精涉獵百家之蹟故其操筆爲文厚而不慧樸而不陋
論文非漢魏不出諸口作文非漢魏不安於心然所遇
止博士弟子員屢試高等薦廩未食命之窮也可勝感
乎篤于友朋不效酒食標榜之習過則相規直言無隱
故人樂與游而復憚之雖有放軼不羈之士見之無不
斂抑年四十餘不昏娶不事生人產性情高潔自好涉
世深者或以怪誕目之儀徵閣學士阮元幼嘗從之游
一既貴先生未嘗通一問及視學山東延先生佐文章乃

以乾隆癸丑十月往明年三月以疾卒於青州試館閣
學士送柩歸揚州於某月某日其弟葬之於某地禮也
循識先生十年時獲聞先生之論將往山東與語於泰
州旅舍自此遂不能見越一年循在青州先生臥榻尚
存具雞酒黍飯向榻而祭時乙卯二月晦三鼓也五月
自山東歸先生墓尚未有志因爲之志銘曰瞻彼齊城
驪馬宵征月孤山冷想見先生元作小傳云喬先生諱
椿齡字書酉甘泉人性穎悟勤學通諸經義涉獵百家
子史尤深于易撰著屢有驗善屬文以漢魏爲法補儒
學生員試輒高等而未嘗食廩餼省試亦不中式先生
性剛直廉介跬步必以禮交游皆擇正士友有過相規
無隱一時偶儻之士見先生皆深自斂抑居陋室甚貧
枕席皆書苟非義雖周之不受體羸多病不昏娶元幼
受業於先生乾隆癸丑元督學山東迎先生冬十一月
相見於曲阜衡量孔顏會孟四氏子弟之文謁至聖
林廟觀禮器先生欣然躊躇若滿志焉明年春至登州
道病近至青州卒於試院年四十三野
有古木元伐之爲先生棺歸葬揚州

平山堂待月

山嫌歌吹俗得月乃能幽況在梅花底堪爲半夜游禪燈何
冉冉林鳥各啾啾暢好開簾坐同君一倚樓

晚煙

江南暮色最銷魂
煙景濃時莫閉門
秋月漁舟楊柳岸
春風牛背杏花村
晚晴半入斜陽影
濕雨低迷遠樹痕
半抹山腰看不足
鐘聲何處又黃昏

新燕

知爾營巢歲歲來
草堂如爲故人開
今年春色渾無主
莫向東風拂翅回

贈鍾鼓厓懷

萬卷詩書入眼空
茆廬蔬圃舊家風
疎狂我尚呼兄事
貧病人都歎道窮
筆陣酒兵旗鼓壯
荆花珠樹日星紅
世間冷淡應加耐
徑入繁華想不同

試燈日坐雪齋中同鍾鼓厓作

踏雪歌聲到燒燈春色催故人溫似玉書屋冷於梅虛白照
千里清寒伴一杯暫須分月影定不污塵埃

將之山左畱別諸同學

久別殊可惜遠行何惻惻抱書出門去千里若同室念我素
心人長少共肝膈風雨孤病時綢繆若膠漆破屋兩三間酣
歌發金石黃河催我渡背聽江流急掃雪登泰山南望江南
日魚鴈拂雲來如見齋頭筆

柬王榕臺

修竹何娟娟綽有美人態六韻想俱成古賢與神會我聞江
南曲玄鳳飛翻墜逸興致爲佳翰墨增藻繪披襟倘一來商
榷摩詞壘

將之泂南舟中別王榕臺

北渡黃河去行膽泰岱雲年來請作客別後却思君燕子閒
春壘丁香冷夕曛齋前丁香一樹常與同好諸君觴咏其下
燕巢之作皆與榕臺蔽厓眉生聯吟者
相期重翦燭歸日細論文